

11399

周易本義
爻徵

吳曰慎 著

中華書局

周易本義爻微

此據惜陰軒叢書
本排印初編各叢
書僅有此本

周易本義爻徵序

講學家喜談易而競辯者好論史。茲二者皆有弊。以空言釋易。初學聽而茫然。不知其爲何事也。事莫備于史。讀史者又往往持三寸之管。騁其巧言偏辭。以臧否古人。其究也將游于遙蕩恣睢而靡所止。此博辯之徒。非性命之正也。甲午春。德僑寓青門。謁同門張玉谿山長。出吳徵仲先生周易本義爻徵以示。先生爲吳蕉鄉師高叔祖。嘗講易石林。著有易義集粹。及周易本義翼。海內學者。仰如山斗。又輯爲爻徵二卷。取上下數千年事。合之三百八十四爻。約而精。微而顯。信而有徵。俾學者觸類引伸。凡得之漁獵者。一可會之于易。德受而讀之。竊歎曰。先輩務學一至此乎。此非獨達于易。蓋精于史也。今而後知讀史之法。不越乎讀易矣。不特此也。史書所傳者。古人之言行耳。吉凶悔吝。生乎動。動而善則爲吉。動而不善則爲凶。爲悔。爲吝。我觀之古。古人一言一行。動而入于吉凶悔吝者。史也。卽易也。我觀之今。今人一言一行。動而入于吉凶悔吝者。卽史也。亦卽易也。我觀之我。凡我之一言一行。動而入于吉凶悔吝者。亦無非史也。無非易也。是書雖止二卷。而易道明。史事通行。身應物之方。亦于是乎該且徧。不必乞靈蓍蔡。而是非得失。瞭焉如指諸掌。是書之隔我後學也。豈淺淺哉。德齒已長矣。久嬰痼疾。屏處窮閭。于人世榮利一無所營。吉固不敢趨。凶亦不敢蹈。所不能免者。悔吝耳。願受一編。置之座右。佩服在躬。永永無斁。道光甲午春二月。旣望後學。盤屋路德謹序。

德既作弁言。師以書授曾淳。將付梓。曾淳病歿。明年師卒於興安郡署。德徧求是書不得。使福先索之。不得。後以語及門汪子。汪子指篋曰。藏此中久矣。開扇鑑而出之。蓋曾淳病革時。以書授汪子曰。吾子幼。恐不免散失。子爲我貯之。以待知者。德獲是書。示孟熙中翰。中翰方刊惜陰軒叢書。喜曰。吾書中正。須此種。急鳩工刻之。計是書之作。經百數十年。未有刊本。今始壽之。叢藜以公海內。顯晦信有時與。然非曾淳善託。汪子慎守。則是書亦廣陵散矣。師諱鳴捷。嘉慶辛酉進士。知鄆州。攝興安守。長子曾淳。字亞農。著有畫苑集成十二卷。今亦存汪子處。福先。曾淳子。汪子名焜。字朶雲。師表姪。休甯人。今家長安。庚子冬十二月路德識。

序

嘗聞道之不可須臾離也。爲其無物不有。無時不然。大極於無外。細入於無間也。是以聖哲迭興。作爲禮樂政刑。詩書六藝。不過欲使天下後世講明遵守。以不失此道焉爾。然在六經。能彌綸兼至者。莫如易。以言乎遠。則不禦。以言乎邇。則靜而正。以言乎天地之間。則備矣。故聖人窮理盡性。極深研幾。以至開物成務。通志斷疑。恆必用之。蓋卦爻既設。而天下之道冒焉。微通夫性命鬼神。顯該夫綱常日用。故自天子至於庶人。聖賢至於愚不肖。莫不在處可施。隨用各足。是以讀者又不可拘方執體。本絜靜精微之理。爲廣大變通之用。斯則深於易者乎。粵觀程子易傳。既明且實矣。朱子復作本義。乃以象包衆理。占應庶務。而不泥於一人一事者。以爲易之道本如是也。說在予之本義翼矣。若乃爻徵之輯。則以程二交予姪諸臣也。二交諸臣有用世之志。嘗欲因經會史。癸亥之夏。從予石林講易。以是爲請。予未之應也。甲子春。又亟言之。既而思曰。夫易固不可以一端盡。然時有消長之不齊。位有當否之或異。聖人觀會通。以行典禮。而道之變動。著於六爻。若徵之往蹟。則尤顯而易見。殆亦窮經致用之方也。於是擬諺象辭。參考載籍。取其事理相符者。輯爲此書。凡先儒已言者十之三。今所採錄者十之七。踰月告成。於是不待窮深極微。而善可爲法。惡可爲戒者。已昭然於心目矣。豈非學易寡過之一助乎。若夫引伸觸類。神明默成。則存乎其人。固非爻徵之所能盡也。因書首簡。以告觀者。康熙甲子三月新安吳曰慎序。

序

吾伯徽仲先生。寢食周易五十餘年。所有易義集粹。已梓行海內。當世大儒君子。咸欽重之。惟所著周易本義翼。畢生精力萃焉。因卷帙繁多。未及刊行。周易折衷內已採列數十條。至於爻徵一書。乃與程兄二交。長兄諸臣。曩年講易石林所輯也。吾伯嘗曰。論事不綜於理。則流爲刑名法術之學。論理不徵諸事。則入於空虛寂滅之談。兩者交讖。故旣默會性命精微之蘊。復上下古今得失。以證吉凶悔吝消長存亡之道。俾讀經者。知以經會史。而讀史者。亦知以史證經。庶幾體用一原。顯微無間。一生學識。略達於此。因與吾弟煒訂而存之。益知聖人謨訓。明徵定保。而窮經可致用也。學者用舍窮達。一動一言。知以是爲法戒。則此書可與朱子綱目並傳不朽。引伸觸類而用之。無窮矣。姪昌謹識。

周易本義爻徵目錄

卷上

上經

卷下

下經

高叔祖徵仲先生所著周易爻徵及就正齋語錄未梓身後遺稿散失徧索不得辛巳秋曾淳自咸陽歸歛過巖市鎮遊書肆于故紙堆中得其鈔本入秦呈家大人家大人喜曰吾求之四五十年乃今得之天幸也即命付梓曾淳謹跋

周易本義爻徵卷上

欽吳曰慎微仲著

朱子云。易如一箇鏡相似。看甚物來。都能照得。自天子至於庶人都使得。若會得卦爻本意。卻不妨當此時居此位。作此人也。

三三乾下
乾上

乾元亨利貞。

初九潛龍勿用。

初九有潛龍之象。是聖賢在下。如舜之側陋。伊尹耕莘。呂尚釣渭。說築傅巖。顏居陋巷之類。

九二見龍在田。利見大人。

見龍。如伊傅周召。得君行道。天下之民咸被其澤也。

九三君子終日乾乾。夕惕若厲。无咎。

乾惕如周公思兼三王。仰而思之夜以繼日。幸而得之。坐以待旦也。○蒙引云。晉周處膂力過人。不修細行。父老指其爲害。處乃厲志好學。卒爲晉名臣。此可見過剛惕厲則无咎也。

九四或躍在淵。无咎。

或躍如堯崩。舜避堯之子。舜崩。禹避舜之子。又如孔子仕止久速。各當其可。亦此爻隨時進退之義。○程傳曰。舜之歷試時也。

九五。飛龍在天。利見大人。

飛龍。如堯舜禹湯。以聖人在天子之位者皆是。○楊龜山曰。此舜之謳歌朝覲時也。

上九。亢龍有悔。

亢悔。如堯舜之子皆不肖。亦盛極而衰也。堯命舜攝位。舜命禹總師而卒禪之。極則變。變則通。无悔之道也。○伊尹復政厥辟。周公復子明辟。知進退存亡而不至於悔也。蔡澤相秦。數月而歸相印。亦知此義。

用九。見羣龍无首。吉。

人君剛而能柔。則仁義並行。恩威相濟。得中之道也。漢武則偏于剛。漢元則一於柔。失君道矣。○朱子曰。君道主剛。而其動也用柔。夫必遠好色。必去小人。必安社稷。必服暴亂。乾之剛也。至於禮臣下。恤百姓。虛心取善。舍己從人。其動莫非柔矣。

䷁ 坤上

坤下

坤。元亨利牝馬之貞。君子有攸往。先迷後得主。利西南得朋。東北喪朋。安貞吉。初六。履霜。堅冰至。

漢成帝始以王鳳爲大司馬大將軍。綱目特書元舅。所以著新莽篡竊之漸也。○唐高宗立武氏爲皇后。卒致革唐爲周之禍。明皇用祿山爲大將。終取失國幸蜀之羞。其餘小人進而君子禍。小不謹而敗大謀者。皆此爻之義也。

六二直方大。不習无不利。

柔順中正。不待思勉。以臣道言。文王至矣。唐郭子儀亦庶幾乎。

六三含章可貞。或從王事。无成有終。

如伊尹樂道耕莘。卒相湯以王天下。孔明高臥隆中。卒輔昭烈以繼漢統。

六四括囊无咎无譽。

如梅福知王莽必篡漢。遂棄家變姓名而去。逢萌懼禍將及。掛冠而歸。將家屬客於遼東。○桓帝時。姜肱獨居土室。或目之爲狂生。後乃免於黨錮之禍。○靈帝時。申屠蟠見范滂等非訐朝政。公卿折節下之。乃絕跡於梁碭之間。自同傭人。及滂等罹黨錮之禍。惟蟠超然免於評論。

六五黃裳元吉。

在堯爲允恭克讓。在舜爲溫恭允塞。在文王爲徽柔懿恭。

上六龍戰于野。其血玄黃。

如漢呂后臨朝。誅殺劉氏子孫。及絳侯誅諸呂。男女無少長皆斬之。○漢何進欲誅宦官。爲張讓所殺。

袁紹捕得趙忠等及諸宦者皆殺之。凡二千餘人。讓後投河死。○如春秋書衛州吁弑其君完。後衛人殺州吁于濮。亦此象也。此類不能悉舉。○以勢陽不敵陰。以理陰不勝陽。故俱傷。用六。利永貞。

坤變乾。雖柔必強。變化氣質者當如之。○臣道主柔。而其動也用剛。不敢倡始。不敢爭先。循分守安。進退之類。坤之柔也。至於犯言敢諫。捐軀盡節。託孤寄命。正色立朝。其動莫非剛矣。

三三 震下坎上

屯元亨。利貞。勿用有攸往。利建侯。

初九。磐桓。利居貞。利建侯。

如孔孟周流列國。欲行道濟時。然孔子進以禮。退以義。得之不得。曰有命。孟子不枉己從人。守不見諸侯之義。是磐桓居貞也。○不以尊貴自驕逸。而屈己以恤人窮。以理民事。是以貴下賤。得民而可君。故利建侯。如舜歷試諸艱而堯禪。禹治水有功而舜禪爾。

六二。屯如遭如。乘馬班如。匪寇婚媾。女子貞不字。十年乃字。

如人逼近於難。遠有外應。未敢遽進。被近者所陵。經久之後。乃得相合。非惟男女而已。萬事皆象於此。○竇融據隴西。志從光武。而隔於隗囂。久然後得合。彷彿此爻之義。

六三。即鹿无虞。惟入于林中。君子幾。不如舍。往吝。

隗囂公孫述皆非霸王之器。又據偏安之地。豪傑如馬援者。又不之與。乃欲與漢光武爭天下。卒自取滅亡。亦此爻之義也。

六四。乘馬班如。求婚媾。往吉。无不利。

己才不足以濟屯。則求賢以自輔。是其明也。子陽井底蛙。不知己也。項羽有一范增而不能用。不知人也可謂明乎。

九五。屯其膏。小貞吉。大貞凶。

周室衰微。桓文強霸。有似於此。

上六。乘馬班如。泣血漣如。

柔居屯極。進無必爲之才。退有無益之泣。朝夕必亡而已。唐之僖昭是也。

䷂

坎下
艮上

蒙亨。匪我求童蒙。童蒙求我。初筮告。再三瀆。瀆則不告。利貞。

初六。發蒙。利用刑人。用說桎梏。以往吝。

書曰。扑作教刑。記曰。夏楚二物。收其威也。書又曰。敬敷五教。在寬。蓋寬以濟猛。此爻之義也。

九二。包蒙吉。納婦吉。子克家。

伊尹周公。輔幼主。施政教。以致太平。如此爻也。

六三。勿用取女。見金夫。不有躬。无攸利。

如谷永阿附王鳳。揚雄爲莽大夫。苟喪失身董卓。凡貪利祿而從不正者。皆見金夫不有躬者也。

六四。困蒙吝。

宋呂榮公嘗言。人生內無賢父兄。外無嚴師友。而能有成者少矣。○周子曰。人生而蒙。長無師友則愚。

○凡不親賢取善。而昏蔽終身者。皆此爻之象。詩曰。不明爾德。時無背無側。爾德不明。以無陪無卿。

六五。童蒙吉。

如成王之於周公是也。太甲亦近之。○楊氏曰。夫湯之於伊尹。高宗之於傅說。皆學焉而後臣之。由斯道也。

上九。擊蒙。不利爲寇。利禦寇。

蒙引曰。擊蒙。卽今之用鞭扑也。爲寇是擊其課程不大進。而責效於旦夕者也。故不利禦寇。是擊其好頑。要遊蕩。以收其放心者也。故利。○程傳曰。若舜之征有苗。周公之誅三監。禦寇也。秦皇漢武。窮兵誅罰。爲寇也。

三三

坎乾上下

需。有孚。光亨。貞吉。利涉大川。
初九。需於郊。利用恆。无咎。

如危邦不入。亂邦不居。天下無道則隱。如伯夷辟紂。居北海之濱。以待天下之清也。

九二。需于沙。小有言。終吉。

如定公初年。孔子在魯不仕。以季平子逐君。陽貨作亂。故不輕進也。

九三。需于泥。致寇至。

如子路仕於衛。輒卒死於孔悝之難是也。

六四。需于血。出自穴。

如子羔仕衛。難作而出。故孔子聞衛亂。曰。柴也其來。由也其死矣。○沛公見羽鴻門。彷彿此爻之義。

九五。需于酒食。貞吉。

爲治者紀綱法度。皆已備舉。而雍容以待治功之成。如夫子所謂必世而後仁是也。○君子居易以俟命。及必有事焉而勿正。心勿忘。勿助長。亦此意也。

上六。入于穴。有不速之客三人來。敬之終吉。

如沛公先入關。項羽怒攻之。項伯與張良善。夜馳見良。欲與俱去。良邀項伯入見沛公。沛公奉卮酒爲壽。約爲婚姻。遂因以謝項羽。而得免於難。此不速之客來。敬之終吉者也。

三三 坎下
乾上

訟。有孚。窒惕。中吉。終凶。利見大人。不利涉大川。

初六。不永所事。小有言。終吉。

召南行露之篇。男侵陵女。女不從。遂誣以有室家之約。貞女乃訟之。初六陰柔。不永於訟。然曰室家不足。則初六之辯明矣。強暴之男。則訟之九四也。曰亦不汝從。則九四不克訟矣。貞女之志。所以得伸者。以有召伯聽訟之明。爲九五之大人也。

九二。不克訟。歸而逋。其邑人三百戶无眚。

如欲與在上者訟。知勢不可敵。而退處卑小。以示屈服。亦免禍之道也。

六三。食舊德。貞厲終吉。或從王事无成。

六三陰柔才弱。守舊居正。不與人訟。未免受人之侵。故有厲。然含忍不報。畢竟是好。故終吉。

九四。不克訟。復即命渝安貞吉。

如虞芮之君。相與爭田。將朝文王而訟之。見周之人無不相讓。乃退。以其所爭之田爲閒田是也。

九五。訟元吉。

舜。中正之大人也。故天下訟獄者。不之堯之子而之舜。○召伯或蒞甘棠之下。以受民訟。人不忍伐其樹。則其中正可知矣。○虞芮欲質成於文王。以文王之中正也。

上九。或錫鞶帶。終朝三褫之。

衛元咺訟衛成公於晉。衛侯不勝。晉人執之。歸於京師。元咺歸立公子瑕。後衛侯歸自京師。殺元咺及

公子瑕彷彿如此爻。

三三 坎下坤上

師貞丈人吉无咎。

初六師出以律否臧凶。

夏王啓甘誓曰。左不攻于左。汝不恭命。右不攻于右。汝不恭命。御非其馬之正。汝不恭命。用命賞于祖。不用命戮于社。○武王牧誓曰。今日之事。不愆于六步七步。乃止齊焉。不愆于四伐五伐六伐七伐。乃止齊焉。○魯公費誓曰。馬牛其風。臣妾通逃。勿敢越逐。○司馬法。坐作進退。皆有常節。無號令節制。是失律也。

九二在師中吉无咎王三錫命。

如舜命禹征有苗。仲康命胤侯征羲和。周宣王命尹吉甫伐玁狁。詩人美之曰。文武吉甫。方叔伐玁狁。詩人美之曰。方叔元老。是剛中之將。承天寵也。

六三師或輿尸凶。

不量勢力不敵。而輕舉妄動以取敗。如楚得臣與晉文戰於城濮。而楚師敗績是也。此類甚多。

六四師左次无咎。

如禹征苗而班師。晉文遇楚而退舍是也。使漢高不至白登。唐太宗不渡鴨綠。何咎之有。

六五。田有禽。利執言。无咎。長子帥師。弟子輿尸。貞凶。

敵加於己。不得已而應之。如蠻夷猾夏。寇賊姦宄。爲生民之害。然後明其罪以討之。禹征苗。啓征有扈。魯征徐戎。高宗伐鬼方。宣王伐玁狁。是也。若秦皇漢武。皆窮山林以索禽獸。非田有禽也。○任將不專而致覆敗者。如晉荀林父鄆之戰。唐郭子儀相州之敗是也。○河曲之師。趙盾爲將。而令出於趙穿。鄆之師。荀林父爲將。而令出於先穀。唐九節度之師。不立統帥。故皆敗也。

上六。大君有命。開國承家。小人勿用。

朱子曰。漢光武定天下之後。一例論功行封。其所以用之在左右者。則鄧禹耿弇賈復數人。他不與焉。合於此爻之義。○此說與本義不同。

三三 坤下
坎上

比吉。原筮。元永貞。无咎。不寧方來。後夫凶。

初六。有孚比之。无咎。有孚盈缶。終來有它吉。

如孔子之於蘧伯玉是也。

六二。比之自內。貞吉。

如伊尹。太公。孔明。懷才抱道。不苟從人。遇聖明之君。致敬盡禮。而後比之。是貞吉也。

六三。比之匪人。

比之匪人。凡居者之鄰。學者之友。仕者之同僚。皆所當戒也。○自學者言之。則友便辟。友善柔。友便佞。是也。自仕者言之。則爲入於不善之黨。如范增之於項羽。嚴尤之於王莽。是皆可傷也。六四。外比之。貞吉。

如禹皋稷契之事堯舜。同心一德。共成巍煥之業也。

九五。顯比。王用三驅。失前禽。邑人不誡。吉。

此王道之大。所以其民皞皞。而莫知爲之者也。王者如天。不令人喜。不令人怒。其比天下之道。光明正大。如堯舜之治。未嘗遠道干譽。取必期望。而自於變時雍。四方風動也。○凡事上處友。於鄉黨親戚。惟誠意盡道以待之。親已與否。在人而已。不可逢迎苟合。以求人之比己。皆三驅失前禽之義也。上六。比之无首。凶。

存疑曰。漢之劉盆子是也。○桀紂幽厲。凡昏庸之主在上。民心離散者皆是。

三三 乾下
巽上

小畜。亨。密雲不雨。自我西郊。

初九。復自道。何其咎。吉。

胡氏曰。文王當紂之時。左右憚人。終不能自止其進也。○如竇融隔於隗囂。馬援隔於公孫述。以其自守不從。其後卒得歸漢。是二人不能阻。乃復自道也。○學者克己復禮。不以人欲害其天德之剛。復自

道也。

九二牽復吉。

與其同志去邪歸正。不屈折其生平。如魏徵隨李密歸唐。徵遣徐世勣書勸之早降。世勣遂決計西向。是世勣與魏徵牽連而復也。○唐安祿山反。常山太守顏杲卿力不能拒。與長史袁履謙往迎之。祿山賜以金紫。杲卿歸途謂履謙曰。何爲著此履。謙悟。乃與杲卿謀起兵討祿山。是履謙與杲卿牽連而復也。

九三輿說輻。夫妻反目。

如荀彧志在復漢。往從曹操。操欲篡漢。而彧輔之不復去。及阻董昭九錫之議。操不悅。彧因飲藥是殺。是說輻反目之象也。

六四有孚。血去惕出。无咎。

此爻是以寡畜衆。以弱畜強。如燕昭王用樂毅之策。連趙魏之師以伐齊。劉先主用孔明之計。結好孫權以抗曹操是也。

九五有孚。攣如。富以其鄰。

如齊桓晉文合諸侯以遏強楚是也。

上九既雨既處。尚德載。婦貞厲。月幾望。君子征凶。

如唐武后之勢既盛。高宗俛首而受其制。遼金之勢既成。宋人帖耳稱臣。與之連和。季氏世執魯柄。而國人不知有君。君亦安於屈辱也。

三三兌下

履虎尾。不咥人。亨。

初九。素履。往。无咎。

君子素其位而行。不願乎其外。在下位。不援上也。○此爻是賢人始進。不變塞也。達不離道也。如伊尹耕於有莘之野。樂堯舜之道。及應湯聘而起。則欲使是君爲堯舜之君。使是民爲堯舜之民。可謂素履之君子矣。

九二。履道坦坦。幽人貞吉。

不得志。獨行其道。順理則裕。故坦坦也。如孔門顏曾諸賢是也。

六三。眇能視。跛能履。履虎尾。咥人凶。武人爲于大君。

如唐文宗時。李訓鄭注以誅宦官爲己任。計不成。反爲宦官仇士良所殺。并殺大臣吏卒二千餘人。訓注本小才。而自以爲能。故及於禍也。○宋韓侂胄欲立功名。以固權位。首謀伐金。以致金人內侵。蜀口淮漢之民。死者不可勝數。公私之力大屈。史彌遠奉寧宗密旨殺之。此亦眇跛而履虎尾者也。○秦政項籍。無大君之德。而自恃其強。故不能久。亦上文取象之義也。

九四履虎尾愬愬終吉。

漢武帝時朝廷多事督責大臣自公孫弘後丞相比坐事死惟石慶以醇謹得終合於此爻○漢高帝殺戮功臣蕭何以善處得免亦是。

九五夬履貞厲。

如漢武帝雄才大略剛果有爲然興土木求神仙建封禪縱遊觀征四夷致海內虛耗百姓疲弊此夬履之厲也。

上九視履考祥其旋元吉。

所履既終則吉凶定而可考若十分善者方得元吉若一分善則一分吉一分不善則一分凶也○如五福六極之應在君則由於極之建不建在民則由於訓之行不行也○作善降之百祥作不善降之百殃○積善之家必有余慶積不善之家必有余殃○祥朕兆也視其所履而知其後來之吉凶如成肅公受脤不敬而劉康公知其不返魯邾二君執玉高卑其容俯仰而子貢知其將亡是也。

䷊ 坤上

泰小往大來吉亨。

初九拔茅茹以其彙征吉。

唐虞之際八元八愷並登於朝周之興也四臣十亂同心同德時泰則羣賢並進也○宋仁宗慶歷以

後君子登朝亦此爻之象。

九二包荒用馮河不遐遺朋亡得尚于中行。

如伊傅周召是主泰而得中道者也。書曰無忿疾於頑無求備於一夫是包荒也。功崇惟志業廣惟勤。惟克果斷乃罔後艱馮河也。闢四門明四目達四聰不遐遺也。官不及私昵惟其能又曰以公滅私朋亡也。○詩曰不競不綏不剛不柔孟子曰武王不泄邇不忘遠皆此爻之義也。

九三无平不陂无往不復艱貞无咎勿恤其孚于食有福。

周道漸衰穆王命君牙有心之憂危若蹈虎尾涉于春冰之言。命伯冏有忱惕惟厲中夜以興思免厥愆之言是艱貞无咎也。其後巡遊無度卒以致亂不食福矣。○漢至武帝海內虛耗宣帝勵精爲治漢業復光此艱貞食福也。

六四翩翩不富以其鄰不戒以孚。

如漢元帝時弘恭石顯靈帝時曹節王甫唐高宗時許敬宗李義府皆結黨陷害忠良此泰極而三陰下復也。○宋哲宗立復章惇蔡卞官惇入相遂引其黨蔡卞林希黃履來之邵張商英周秩翟思上官均等居要地任言責協謀朋姦報復仇怨追貶元祐宰執呂公著司馬光等安置呂大防范純仁等三十人正合此爻。

六五帝乙歸妹以祉元吉。

如成王之於周公。商高宗之於傅說。劉先主之於孔明。唐太宗之於房玄齡。杜如晦。魏徵是也。上六。城復于隍。勿用師。自邑告命。貞吝。

周室東遷。號令不行於天下。其後爲東周君。獨守河南二邑。卽此爻之義也。○九三之時。尙可爲也。故能艱貞則无咎。上六之時。不可爲也。雖自邑告命。而不免於吝。此所以貴制治於未亂。保邦於未危也。歟。

三三

乾坤上

否之匪人。不利君子貞。大往小來。

初六。拔茅茹。以其彙。貞吉亨。

漢成帝時。王鳳。王商。王立。王根。王音。並進用事。乘時奢靡。王莽獨恭儉謹勸。收聘賢良。斯時惡未形也。所行有似於貞。但其志不在君。故終不能變爲君子耳。○唐張昌宗。誣陷魏元忠。引張說爲證。說許之。後聽宋璟。劉知義之戒。說於太后前。言昌宗逼臣。使誣證之耳。元忠得不死。是小人而變爲君子也。六二。包承。小人吉。大人否亨。

王莽得政。以大司徒孔光名儒相三主。太后所敬。於是盛尊事光。此包承也。但光不能否亨。不足以爲大人耳。嚴尤。荀彧之徒亦然。○如陽貨欲見孔子。先來加禮。孔子時其亡而往拜之。雖相遇而不親。終不亂於小人之羣。是大人否亨也。○王莽遣使者奉璽書印綬。迎龔勝。勝不食而死。莽以安車迎薛方。

方婉辭不至。亦可謂不亂羣者矣。

六三。包羞。

如小人有勢位而短於才。欲害君子而未能也。漢元帝時。史高外屬。尊重。與蕭望之有隙。宦官弘恭石顯。詐致望之下獄。上責恭顯。二人因使史高言於上。免望之爲庶人。彷彿此爻之象。

九四。有命。无咎。疇離祉。

如漢宣帝擢用朱邑。龔遂。蕭望之。尹翁歸。黃霸。諸賢臣是也。武帝之世。漢之否也。至是將濟矣。諸臣无咎離祉也。如趙廣漢。蓋寬饒。韓延壽。楊惲之見殺。亦以陽居陰不極。其剛之義有未盡歟。○周宣王中。興之佐。如尹吉甫。方叔。召穆公。仲山甫。是无咎離祉也。

九五。休否。大人吉。其亡其亡。繫于苞桑。

周宣王承厲王之亂。用諸賢佐。撥亂修政。法文武成康之遺制。海內翕然向風。諸侯復宗。此休否也。遇災而懼。則曰周餘黎民。靡有孑遺。大命近止。靡瞻靡顧。此其亡其亡也。卒成中興之業。是繫于苞桑也。上九。傾否。先否後喜。

如有夏昏德。民墜塗炭。湯代虐以寬。兆民允懷。紂毒痛四海。罪浮于桀。武王伐之。天下大定。漢光武之中興。皆傾否者也。

三三。離上乾下

同人于野。亨利。涉大川。利君子貞。

初九。同人于門。无咎。

君子尊賢而容衆。嘉善而矜不能。周而不比。羣而不黨。是也。○無內外。無爾我親疏厚薄。隨其分而處之。猶出門同人。而無家人偏暱之私也。

六二。同人于宗。吝。

不能大同而繫於私。則有阿黨之吝。如事君者將順而少匡正。盡瘁而不薦賢。交友者可則與。不可則拒。治民者驩虞小惠。不能及遠是也。

九三。伏戎于莽。升其高陵。三歲不興。

凡圖非已有者。皆徒勞而无功。此爻之義也。○春秋書公次于滑。欲救紀而不能。以齊強故也。

九四。乘其墉。弗克攻。吉。

春秋趙宣子納捷菑於邾。邾人辭之以義。宣子引師而去之。先儒引此爻之義以美之。蓋聞義能改。誠人情之所難也。○同人三四皆爭奪。六二一陰爻。以人事言。則婚姻爲最切。古人於與國。用力以求必得。如晉楚爭陳鄭之類。又如齊桓之得管仲。當時亦用許多計數。恐不得之於魯。

九五。同人先號咷而後笑。大師克相遇。

如周公遭管蔡武庚流言。避位東居。成王感悟。迎公以歸。而誅武庚管蔡是也。○凡心同而爲小人所

閒必去其閒者而後得合。君臣朋友親戚皆然。○此爻當與屯六二參看。

上九同人于郊无悔。

无事任无交與人不與之同。靜而無動。故雖無同亦無悔。○胡氏云。如荷蕢之徒然。荷蕢本不欲與人同。與此爻異。

三三 離乾下

大有元亨。

初九无交害匪咎艱則无咎。

生當盛世。民物豐富。易有驕盈之失。惟初剛正位卑。寡交事淺。浮侈之心未作。勤儉之心未變。故无害。猶必艱以處之。則終无咎。蓋危者使平。易者使傾。易之道也。○如漢光武徵處士王良用之。良在位恭儉。布被瓦器。妻子不入官舍。後病歸。復徵不應。是此爻之象。如嚴光周黨未嘗受祿。與此稍異。

九二大車以載有攸往无咎。

才德茂而得君之委任。古之可以當此爻者。伊傅周召其人也。

九三公用亨于天子小人弗克。

亨于天子。有被遇親接之意。非常朝也。天子優禮勤勞。如天王賜胙於齊桓晉文者然。由是諸侯以玉帛方物。朝獻於天子。以致尊君敬上之心。若小人无君上之禮遇。則无由朝獻於天子也。○九二宰相

任重之事。九三諸侯朝獻之事。

九四匪其彭无咎。

伊尹之於太甲。周公之於成王。霍光之於漢昭帝。郭子儀之於唐代宗。此爻是也。臣罔以寵利居成功。伊尹之匪彭也。公孫碩膚。赤鳥几几。周公之匪彭也。出入朝堂。小心謹慎。卽僕射竊識視之。不失尺寸。霍光之匪彭也。功蓋天下而主不疑。位極人臣而衆不嫉。郭子儀之匪彭也。

六五厥孚交如威如吉。

漢文帝寬仁恭儉。將相多舊功臣。至於殺薄昭。伸國法。則奮然剛斷。是威如也。○宋仁宗恭儉仁恕。信任韓琦富弼呂夷簡范仲淹等。是厥孚交如。但仁柔有餘。而剛武不足。是以常有裔霍之禍。不能如漢唐之盛也。○時當大有。豈難易生。故明罰勅法。董正治官。詰爾戎兵。皆威如之道。不可不講也。

上九自天祐之吉无不利。

如堯之從舜。舜之從禹。湯之於伊尹。昭烈之於孔明。皆履信思順而尙賢。故天祐而吉也。

䷁ 坤上

謙亨君子有終。

初六謙謙君子用涉大川吉。

顏子願無伐善。無施勞。以能問於不能。以多問於寡。有若無。實若虛。是謙謙君子也。○謙謙之道。雖用

以濟險亦吉。況平居乎。

六二鳴謙貞吉。

如孔子德愈盛而心愈下。其謙已誨人。具見論語。而周流所至。以溫良恭儉讓得聞國政也。

九三勞謙君子有終吉。

周公身當大任。上奉幼主。夔夔恭畏。吐哺下賢。禹成允成功。不自滿假。惟不矜天下。莫與爭能。惟不伐天下。莫與爭功。是勞謙有終也。唐之郭子儀亦是。若孟之反不伐。是勞謙之一端也。

六四无不利撝謙。

若蘭相如之讓廉頗。寇恂之屈賈復。彷彿此爻之義。○唐宰相盧懷慎。清謹儉素。自以其才不及姚崇。每事推崇。亦撝謙之意也。○漢光武以竇融爲大司空。融自以非舊臣。一旦入朝。在功臣之右。每召會進見。容貌辭氣。卑恭已甚。帝愈親厚之。

六五不富以其鄰。利用侵伐无不利。

若舜之征有苗。文王之伐密伐崇是也。如漢文帝屈於匈奴。與之和親。是一於柔。不用侵伐。不能以威武濟其謙柔也。

上六鳴謙利用行師。征邑國。

謙極得人心。雖行師亦利。他事可知矣。○此卦下三爻皆吉而無凶。上三爻皆利而無害。謙之效如此。

可不務哉。

三三三 坤下
震上

豫。利建侯行師。

初六。鳴豫。凶。

如唐順宗時。王伾王叔文用事。韓泰柳宗元劉禹錫等。采聽謀議。汲汲如狂。互相推獎。倏然自得。以爲伊周管葛復出。是鳴豫也。

六二。介于石。不終日。貞吉。

漢宣帝時。疏廣疏受爲太子傅。知太子柔弱。不去懼有後悔。卽上疏乞骸骨去。是二疏見幾而作。不俟終日也。○漢穆生以醴酒不設而去。楚曰。不去。楚人將黔我於市。晉張翰顧榮見晉室將亂。或託思慕鱸而歸故鄉。或率妻子先逃於林慮山中。甚者如唐楊元琰。請爲僧以免武三思之害。漢金日磾不肯納女後宮。不肯受柁侯之封。以全其宗。勝於霍光遠矣。此皆介于石。不終日。而見凡事之幾微也。

六三。盱豫悔。遲有悔。

漢章帝時。竇憲專權強橫。班固趨其權寵。利其富貴。爲之典文章。憲被誅。班固以竇氏賓客。收捕死獄中。此盱豫有悔也。

九四。由豫大有得。勿疑。朋盍簪。

天子之豫，由己致之。如伊尹、周公，其人也。然伊尹必數求哲人，周公必吐哺求賢也。如諸葛孔明相蜀，開誠心，布公道，集衆思，廣忠益，合於此爻之義。

六五，貞疾，恆不死。

如衰周之君，受制於大國，威令不行，下堂而見諸侯，是貞疾也。然未有大失人心之事，而得僅保其位，此恆不死也。又如漢魏末世之主，唐肅代以後諸帝，皆受制於下，而僅存位號者也。

上六，冥豫，成有渝，无咎。

昏冥於豫，宜有咎矣。若能改過遷善，則无咎。如楚莊王聽伍舉之諫，而罷淫樂，國以益強，齊威王因淳于髡之諷，而行誅賞，齊遂大治是也。漢武晚年輪臺之詔亦然。

三三 兌下

隨，元亨利貞，无咎。

初九，官有渝，貞吉，出門交有功。

友直，友諒，友多聞，益矣。是貞吉也。樂多賢友，益矣。是出門交有功也。○如居是邦也，事其大夫之賢者，友其士之仁者，友一鄉之善士，以至一國天下之善士，此爻之義也。

六二，係小子，失丈夫。

如管叔以武庚叛，揚雄爲莽大夫是也。○女之從夫，臣之從君，弟子之從師，士之交友，皆有此爻之象。

如見小利則大事不成。或小不忍而亂大謀。或貪近功而忘遠圖之類。亦是也。

六三。係丈夫。失小子。隨有求得。利居貞。

如王陵以兵屬漢。而項羽執其母以招之。不就。韓信去項羽。因蕭何而得拜大將於漢是也。○凡昏之從明。事之從善。皆是。

九四。隨有獲。貞凶。有孚在道。以明。何咎。

此爻伊尹周公孔明是也。○唐郭子儀當強賊未平。則慷慨流涕。或單騎見虜。以紓國難。是有孚也。握重兵於外。又有百戰之功。朝廷所以處之。屢失其宜。而無纖芥顧望之意。朝開命。夕啓行。是在道也。故權傾天下。而朝不忌。功蓋一世。而上不疑。真萬世人臣之法也。○蕭何最能善處功名。以消上心之疑。韓信挾功求賞。能無凶乎。霍氏之禍。起於驕乘。不能有孚在道也。

九五。孚于嘉吉。

如堯舜禹湯文武之於五臣。十亂伊傅輩。知之深。任之專。而無毫髮之疑也。後世如漢光武之於鄧賈。唐太宗之於房杜。亦皆孚于嘉者也。

上六。拘係之。乃從維之。王用亨于西山。

如七十子之服孔子。雖畏於匡。阨於陳蔡。而不去。舅犯趙衰等從重耳出亡。備歷艱苦而不離。五百從田橫於海島。而無叛色。荊楚之士。從劉備於江南。而依依如雲。皆隨之固結者也。○程傳曰。太王去豳。

遷岐。商人從之如歸市。隨之固結如此。故王業用此亨盛於岐山也。此與誠意之極可通神明不同。

三三 巽下
艮上

蠱。元亨利涉大川。先甲三日。後甲三日。

初六。幹父之蠱。有子考无咎。厲終吉。

如漢宣帝勵精爲治。漢業中興。唐憲宗伐叛討逆。威令復張。是蠱未深而能幹者也。

九二。幹母之蠱。不可貞。

世固有父喪而母任家事者。又或家事之敗。由於婦人亂政。而其才子能飭之。爲幹母之蠱。又凡以柔居尊。性暗而難開者。皆有母蠱之意。幹之者不可堅固。盡其剛直之道。如周公之於成王。孔明之於後主是也。○宋司馬公入相。盡變熙寧之法。可謂善矣。亦有不必要變者。如僱役之類。是未得中也。

九三。幹父之蠱。小有悔。无大咎。

蠱非剛不能幹。然過剛不中。未免有拂戾之嫌。如宋元祐間。汪觀孫覺劉摯等欲盡去小人。疾惡太甚。而小人陰圖報復。未免有悔。若元祐諸賢。有以善道而巽入之。則其毒將不至於後來之甚也。

六四。裕父之蠱。往見吝。

如周平王東遷。號令不行。宋高宗南渡。儉安忍恥。其後勢日微弱。此裕蠱往吝者也。

六五。幹父之蠱。用譽。

如商高宗用甘盤傳說祖已而商道復興周宣王用尹吉甫仲山甫召虎方叔而周以中興是也程傳以太甲成王蒙引以宋仁宗實此爻雖於用賢致譽有合然非幹父之蠱者也

上九不事王侯高尙其事

有才德而不當事任如伊尹太公之初顏曾子思之徒是也若不事王侯又不高尙吾身之德義徒潔身亂倫索隱行怪未免於過也其志豈可則乎

三三

兌下
坤上

臨元亨利貞至于八月有凶

初九咸臨貞吉

宋元祐初汪觀孫覺劉摯蘇轍等論蔡確章惇韓縝呂惠卿等之罪俱免官惠卿貶竄是陽進凌陰也九二咸臨吉无不利

如舜攝位而流共工放驩兜竄三苗殛鯀以四凶未順命故咸臨以去之

六三甘臨无攸利既憂之无咎

唐武后嘗命朝貴宴集張易之兄弟位在宋璟上易之素憚璟欲悅其意虛位揖之曰公方今第一人何乃下坐此甘臨也然不能憂而改行從善終不免廡下之誅也

六四至臨无咎

二人同心其利斷金。同心之言其臭如蘭。情意懇篤相臨至切者也。友道得矣故无咎。○又如居近君之位柔順得正而下賢切至周公是也。○四至臨爲相之折節下賢五知臨爲君之知人善任。

六五知臨大君之宜吉。如帝舜能用禹皋陶而臨下以簡謂之大知也。

上六敦臨吉无咎。

敦臨者篤於其終如晏平仲善與人交久而敬之是也。又教思無窮容保民无疆亦敦臨之義也。

三三 坤下
巽上

觀。盥而不薦有孚顒若。

初六童觀小人无咎君子吝。

兒童識見昏淺不能識君子之道者也。如細民身居草野不能遠見乃其常分有位者以天下國家爲事而如是則可羞也。○童觀是茫然無所見百姓日用而不知者也。闕觀是所見者小而不見全體中人以上之事也。

六二闕觀利女貞。

獨居一室不知天下之事或遙度事宜實无燭見之明者是闕觀也。○士君子亦須遠歷四方以廣其聞見如孔子自謂東西南北之人者是也。又如司馬子長邵堯夫蘇子由皆求盡天地之大觀而不屑

爲闕觀之女貞者也。

六三觀我生進退。

天民達可行於天下而後行之。是觀我生而進也。子使漆雕開仕。對曰。吾斯之未能信。是觀我生而不進也。不進則退也。○漢高欲興禮樂。魯兩生不肯行。知漢高不足與興禮樂也。劉先主欲復漢室。諸葛孔明從之。知先主可與有爲也。范增不知項羽之不足與有爲。而從之以取天下。楊龜山不知蔡京之不足與有爲。而欲維持天下事。可謂不善審於進退。而失此爻之義矣。

六四觀國之光。利用賓于王。

明聖在上。而懷才抱德之士。得近其光華。輔君施澤。如諸侯入爲天子公卿。賢士出而任職左右也。○舜之徵庸。尹之膺聘。說之爰立。是觀光用賓也。

九五觀我生。君子无咎。

九五中正以觀天下。如堯舜禹湯文武之君也。占者若合於君子之道。則足以觀示天下而无咎矣。上九觀其生。君子无咎。

不當事任。如賓師之位。孟子去齊。齊王欲留之。使諸大夫國人皆有所矜式。是以君子之德爲下所觀也。○賢人君子。不在於位。而道德爲天下所觀。占者苟未君子。則何以使人觀仰矜式。是其咎也。

噬嗑亨。利用獄。

初九。履校滅趾。无咎。

小懲大誡。止惡於初。則不貽惡。積罪大之凶禍矣。故曰。刑期無刑。辟以止辟。若不懲之於初。俟其惡深而後治之。所傷雖大。而終難盡革。凡教人治人者。不可不知此義。○如漢文帝時。淮南王長入朝。以怨擊殺辟陽侯。審食其帝不之罪。後歸國益驕橫。及謀反。廢處蜀郡。憤恚不食死。失此爻之義矣。

六二。噬膚滅鼻。无咎。

以中正治獄。何難之有。但己本柔弱。所治強梗之徒。有不服。未免少損其威。然能善治。終无咎也。

六三。噬腊肉。遇毒。小吝。无咎。

今之斷訟。人不輸服。而反致告訐者。是遇毒也。我方治彼而彼反傷我。固爲小吝。然彼本有罪。在我自當治之。而不爲過。始雖頑梗。終必輸服。故无咎。○漢蕭望之使御史案韓延壽放散官錢舊事。延壽亦案校望之前事。宣帝各令窮考。望之卒無事實。而延壽奢僭逾制。竟坐棄市。彷彿此爻之義。

九四。噬乾肺。得金矢。利艱貞吉。

強梗難治之徒。而亦得其輸服。如召伯聽雀角鼠牙之訟。而貞女得以自明。唐唐臨所處之囚。見高宗自謂無冤是也。○漢于定國爲廷尉。決疑平法。務在哀鰥寡。罪疑從輕。加審慎之心。是艱貞也。

六五。噬乾肉。得黃金。貞厲无咎。

如舜之四罪而天下咸服。避位而認獄皆歸。惟明克允。欽恤好生是也。

上九何校滅耳凶。

怙終不悛。故惡積而不可掩。罪大而不可解。何凶如之。故人不可不審聽而早圖也。○古今人小過不改。馴至大惡而殺其身者。比比然也。○唐元載弄權舞智。政以賄成。僭侈無度。代宗戒之不悛。會有告載謀爲不軌者。上命收載。賜自盡。

三三 離下

賁亨。小利有攸往。

初九賁其趾。舍車而徒。

守節處義。而安於貧賤。如孔子所謂不義而富且貴。於我如浮雲。孟子所謂飽乎仁義。所以不願人之膏粱之味。令聞廣譽。施於身。所以不願人之文繡也。○古之恬退者。自謂安步以當車。晚食以當肉。無罪以當貴。其賁趾舍車之義歟。

六二賁其須。

以柔附剛。中正相與。如漢陳平患諸呂。力不能制。用陸賈言交驩周勃。兩人深相結。呂氏謀益衰。後竟誅呂安劉。又如唐盧懷慎與姚崇同爲相。自以才不及崇。每事推之。時人謂之伴食宰相。皆有賁須之象。

九三。賁如濡如。永貞吉。

晉重耳出奔至齊。安於齊姜。而忘四方之志。可謂溺於所安矣。不有齊姜子犯醉遣之謀。安有霸晉之事。然後知二陰果足以溺人。聖人永貞之戒。信不誣也。○凡丈夫之於妻妾。人君之於臣下。官長之於左右。皆不可溺於所安。而自失其守。以致爲彼所陵也。蓋近之則不遜。不可不戒。

六四。賁如皤如。白馬翰如。匪寇婚媾。

如關羽本劉備之臣。不幸爲曹操所得。猶四與初相賁。而爲三所隔也。羽終無留意。所謂白馬翰如。然操非欲害羽。乃欲用之。所謂匪寇婚媾也。

六五。賁于丘園。束帛戔戔。吝。終吉。

不貴文而貴質。卽林放問禮之本之意也。晏子一狐裘三十年。豚肩不掩豆。其束帛戔戔者歟。○敦本尙實。如豳風七月之詩。諄諄於農桑。無逸之書。欲人君知稼穡之艱難。漢文帝之恭儉重農。武帝下輪臺之詔是也。

上九。賁。无咎。

承文勝之弊。而返之以就於質。卽夫子寧儉寧戚之說。白賁之義也。○孔子簞得賁而愀然不樂。曰。吾聞丹漆不文。白玉不雕。寶珠不飾。質有餘者不受飾也。亦此爻之義乎。○老聃爲周柱下史。習於禮者。故夫子從而問焉。後一掃去繁文而事清淨亦近此。

三三 坤下
艮上

剝不利有攸往。

初六剝牀以足蔑貞凶。

宋神宗以王安石爲參知政事。變法立司。呂誨上疏言大姦得路。羣陰彙進。則賢者盡去。亂由是生。誤天下蒼生必此人也。誨遂見黜。此爻之義也。

六二剝牀以辨蔑貞凶。

王安石變法。薦用呂惠卿陳升之。曾布韓絳鄧綰。諸附己者爲執政。黜貶呂公弼劉琦范純仁呂公著。蘇轍劉摯富弼韓琦趙抃張方平。諸不附己者。其剝漸進矣。

六三剝之无咎。

漢靈帝時。宦官曹節王甫等。誣陷李膺杜密范滂諸賢爲鉤黨。死徙廢禁者數百人。中常侍呂強因張角之亂。勸帝盡赦黨人。還諸徙者。是衆方剝陽。而呂強獨應之也。

六四剝牀以膚凶。

如曹節王甫殺竇武陳蕃。遂遷竇太后於南宮。於是羣小得志。士大夫皆喪氣是也。凡小人黨盛而殘害忠良。劫制君上。皆此爻之象。

六五貫魚以宮人寵无不利。

如武后革唐爲周，獨信重狄仁傑，嘗謂之國老而不名。仁傑好面折廷爭，武后每屈意從之，彷彿有衆陰之長，率其類受制於陽之意。

上九，碩果不食，君子得輿，小人剝廬。

如武后革唐，舉朝皆武氏之臣，獨狄仁傑以一身殉唐，薦用張柬之、桓彥範、敬暉等，卒復唐祚，是碩果復生之象也。○戰國時，人尙富強變詐，惟孟子守聖道，明仁義，以見知自任，而啓後世之聞知。孟子其衰周之碩果乎？○亂極自當治，陽與君子之道不可亡也，故發碩果之義。

三三 震下
坤上

復亨，出入无疾，朋來无咎，反復其道，七日來復，利有攸往。

初九，不遠復，无祇悔，元吉。

顏子有不善未嘗不知，知之未嘗復行，此克己復禮之功切至也。故夫子以此爻贊之。○以道統既絕，而復續言，則宋周子開其先，復之初九也。而程朱大儒繼出，是朋來之休復者歟。

六二，休復吉。

子貢問爲仁，子曰：「事其大夫之賢者，友其士之仁者。」子賤能尊賢取友，以成君子之德，此爻是也。

六三，頻復厲，无咎。

如不善之人，性又躁動，故復善不固。如漢元帝知蕭望之之賢，而爲宦官詐致於獄，既而知之，責恭顯

矣。又信史高之言，免望之爲庶人。後復倚任望之，又爲恭顯誣奏，請召致廷尉。上曰：「蕭太傅素剛，安肯就吏顯等言，必無所憂。」上乃可其奏。望之自殺。上切責恭顯，二人叩頭謝罪，竟不之究。此頻復之象也。

六四，中行獨復。

如寺人披之事君，漢鄭衆之辭賞，呂強之直諫，唐馬存亮之弭亂，張承業之竭忠，皆宦官之陰類，而獨能從陽剛之善道也。

六五，敦復無悔。

如太甲成王悔過遷善，卒爲商周之令主，是能敦復者也。

上六，迷復凶，有災眚，用行師，終有大敗，以其國君凶。至于十年不克征。

如桀紂秦二世隋煬帝之類是也。

三三

震下
乾上

无妄，元亨利貞，其匪正有眚，不利有攸往。

初九，无妄，往吉。

无妄，誠也。至誠未有不動者。如是而往，以上則得君，以下則得民，以內則順親，以外則信友，事無不立，功無不成矣。○凡聖賢所爲，皆以无妄而往者也。

六二，不耕穫，不菑畲，則利有攸往。

因時順理。盡吾分之所當爲。而始終無營求計較之私心。故雖不謀利而自有其利。不計功而功無不成。如聖人無爲而治。學者不要人爵而人爵從之是也。

六三。无妄之災。或繫之牛。行人之得。邑人之災。

如孔子貌似陽虎。被圍於匡是也。○此與楚國亡猿而禍延林木。城門失火而殃及池魚者。正相類。九四。可貞。无咎。

乾剛可以有爲。下無應與。僅可自守。如陶淵明志欲爲孔明。奈無一旅之衆。故終於處士。謝疊山亦欲爲宋程嬰。然卒無所藉手。而志於賣卜也。

九五。无妄之疾。勿藥有喜。

如文王美里之囚。周公流言之變。是无妄之疾。文王不殄厥愠。亦不隕厥問。周公公孫碩膚。德音不瑕。皆勿藥而自愈也。○舜之有苗。孔子之叔孫武叔。亦无妄之疾也。○凡我所處。本自當理。无可虞者。乃爲人所疑沮。自惑而遷之。則失是取非。反足以招咎。是試无妄之藥也。然未能无妄而致疾。又未可忘自反之功也。○如匡人圍孔子。孔子與弟子援琴而歌。匡人知非陽虎也。遂解去。合此爻之義。

上九。无妄。行有眚。无攸利。

處時之極。必信必果。膠固不通。如尾生孝己之行。窮而不知變者也。

三三 乾下
艮上

大畜利貞。不家食吉。利涉大川。

初九有厲利已。

漢中屠蟠見幾而作。獨免黨錮之禍。後又不屈於董卓。異於荀爽諸人矣。是此爻之象。○宋邵堯夫當王安石變法之時。人屢薦之不起。後補潁州團練推官。稱疾不行。

九二輿說輶。

凡昏主姦臣在上。而賢人君子安於貧賤。不輕仕進者。如顏曾閔冉之類是也。○宋劉勉之以時禁伊洛之學。力耕自給。澹然无求於世。朱子從之學焉。

九三良馬逐利艱貞。曰閑輿衛。利有攸往。

如宋元祐時。以程正叔爲崇政殿說書。司馬光呂公著薦之故也。○元祐間諸賢並進。伸於羣姦所畜之後。是良馬逐也。乃與私忿小怨。自分黨與。互相攻擊。於艱貞曰閑之道。猶有未至者歟。

六四童牛之牯。元吉。

止惡於初。微而易制。所謂禁於未發之謂豫也。如唐太宗論止盜。以去奢省費。輕徭薄賦。選用廉吏。使民衣食有餘。則自不爲盜。安用重法耶。得此義矣。○蘇氏曰。止亂以義。止盜以義。使人皆知父子君臣之義。誰與爲亂哉。○如上兵伐謀。不戰而屈人之兵。亦此義也。

六五積豕之牙吉。

如止盜不尙威刑而修政教使之有農桑之業知廉恥之道則得其要而盜止矣○銷亡大盜之術莫大於籠取天下之豪傑豪傑旣爲我籠取則彼卒材風輩雖多不足憂矣此得殲豕之義者也○豕牙本能傷物旣殲則其牙不爲害矣如魏已伐韓齊師直走魏都而韓師自解得要害也項羽以范增爲謀主陳平以計閒之增死而項勢益盛壞其心腹也

上九何天之衢亨

呂尙屠於市而不利入見棄於室人韓信寄食於漂母受辱於胯下畜之極矣呂尙遇文武伐紂而成王業韓信遇漢高誅秦蹙項以定天下所謂何天之衢也然大學補傳所謂用力之久一旦豁然貫通者亦是此意多識前言往行以畜其德者以之可也

三三

震上

頤貞吉觀頤自求口實

初九舍爾靈龜觀我朵頤凶

以陽從陰迷欲而失節如東漢之華歆是也又樂正子從子敖之齊孟子斥其徒鋪啜亦此爻之象六二顛頤拂經于丘頤征凶

如柔弱無能者求養於卑賤之人非常理矣欲求養於有權位之人而非其親故彼必不與而反致困辱也○春秋書天王使冢父來求車毛伯來求金武氏子來求賻此以上求下正顛頤拂經之義也

六三。拂頤。貞凶。十年勿用。无攸利。

此徇利而忘義。縱欲以傷生者。如太康以逸豫失天下。商紂以淫酗取滅亡之類。皆拂頤而凶也。

六四。顛頤吉。虎視眈眈。其欲逐逐。无咎。

四在人上而才不足以養人。乃求在下之賢以共濟。其求之也專且久。可以養人而不窮矣。○唐張說喜推薦後進。善用人之長。多引天下知名士。以佐佑王化。○漢胡廣歷任三公。所辟多天下名士。練達故事。明解朝章。亦求賢共濟之象。

六五。拂經。居貞吉。不可涉大川。

爲君者不能養人。而賴師傅大臣之賢者以養人。是正道也。若自用以涉險。則不利矣。此如太甲之任伊尹。成王之任周公。後主之任孔明是也。

上九。由頤。厲吉。利涉大川。

如伊尹周公孔明之輔君養民。兢兢業業。思慮詳審。處置得宜。而能濟天下之難也。

三三

巽下兌上

大過。棟桡。利有攸往。亨。

初六。藉用白茅。无咎。

如彭祖觀井。先以輪蓋井上。又以繩繫身而繫於木。然後觀之。過於畏慎者也。○凡聖賢兢兢業業。戒

謹恐懼。思患預防。謀出萬全。皆此道也。

九二。枯楊生稊。老夫得其女妻。无不利。

剛稍過而得柔以濟之。如家主治家太剛。而內人時導之以寬厚。長官用法太嚴。而佐武輔之以寬厚。則下無怨矣。又如老父之得才子。足以幹家之蠱。庸君之得賢臣。有以振國之衰。餘可類推。

九三。棟橈凶。

如剛愎自用者。然太剛則折。宋王安石似之。

九四。棟隆吉。有它吝。

大臣剛能用柔。克勝重任者也。若更繫於在下之柔。太柔則廢矣。○如唐郭子儀。棟之隆者。杜鴻漸之於崔旰。有它吝者也。

九五。枯楊生華。老婦得其士夫。无咎无譽。

在我過剛失當。而所比又過柔委靡。如君既躁而臣又暗。父既老而子又弱。不足以有爲也。

上六。過涉滅頂凶。无咎。

此爻宋文天祥陸秀夫張世傑。可以當之。

習坎有孚。維心亨。行有尙。

初六。習坎。入于坎窞。凶。

如新莽時。將軍甄豐。國師劉秀。前後皆自殺。是習坎入坎者也。又凡柔暗無才之人。在事勢危險之地。鮮有不終身憂辱。以陷於死亡者矣。

九二。坎有險。求小得。

漢成帝時。劉向極憂王氏擅權之禍。遂上封事。天子召見歎息。然終不能用。是在險小得之象。

六三。來之坎坎。險且枕。入于坎窞。勿用。

詩云。進退維谷。又云。其何能淑。載胥及溺。此爻是也。○如燕將保聊城。懼讒不敢歸。田單攻聊城不下。使魯仲連遣燕將書。勸之歸燕。或降齊。燕將欲歸。恐見誅。欲降齊。恐已降而後見辱。遂自刃。

六四。樽酒簋二。用缶。納約自牖。終无咎。

大臣當艱阻之時。不可以直遂。惟盡忠誠。委曲以求遇。如趙太后不肯以長安君爲質於齊。大臣強諫不聽。左師觸讐以愛子當使之有功。以長久富貴。婉導之而長安君出質。如漢高祖欲易太子。周昌叔孫通切諫不從。張良以四皓帝所不能致。乃招四皓隨太子入朝。帝見怪問。謂太子羽翼已成。不可動搖。遂不復易。此因其所明而通之。納約自牖之義也。

九五。坎不盈。祗既平。无咎。

如漢光武初年。尙有隗囂。公孫述。盧芳諸僭國。是坎不盈也。十三年以後。祗既平矣。

上六係用徽纆。寘于叢棘。三歲不得凶。

如千乘之國。峙乎大國之間。加之師旅。因之以飢饉。而又有內變。發乎蕭牆之內。尙能國乎。又周赧王漢獻帝之類。亦其象也。

三三離上離下

離。利貞。亨。畜牝牛吉。

初九履錯然。敬之无咎。

漢文帝欲以賈誼任公卿。大臣短之曰。年少初學。專欲擅權。紛亂諸事。上於是疏之。不用其議。○子張學干祿。是履錯。夫子教之慎言行。寡尤悔。是敬之无咎也。

六二黃離元吉。

柔麗乎中正。蓋所親附之人。所由之道。所主之事。皆得正也。如所立者必天下之正位。所行者必天下之大道。必事其大夫之賢者。必友其士之仁者。此類是也。○以臣道言。禹臯伊傅周召其人也。

九三日昃之離。不鼓缶而歌。則大耋之嗟。凶。

盛必有衰。始必有終。常道也。安常自樂。則无用嗟矣。所謂樂天知命。故不憂。所謂居易以俟命。夙壽不貳。修身以俟之。皆鼓缶而歌之義也。○程傳曰。此處死生之道也。然盛衰得失循環之理。處之皆如是。九四突如其來如。焚如。死如。棄如。

凡繼人任事之初。須和緩詳密。巽讓順承。若舜啓然。乃克有濟。若過於剛。急遽更張。不以其漸。則激變生災。而至於自焚矣。如秦政項籍。豈能久也。秦政一夷大國。遂掃滅百王之法。項籍遂殺子嬰。裂天下以封諸侯。獨爲霸王。何暴哉。

六五。出涕沱若。戚嗟若吉。

如人主存心善而處事不當。左右又皆權臣。若能憂懼。庶可保其位也。漢宣帝初年似之。上九。王用出征。有嘉折首。獲匪其醜。无咎。

如湯武之師。誅其君而弔其民。及所謂殲厥渠魁。脅從罔治。舊染汙俗。咸與惟新也。

周易本義爻徵卷下

三三 艮下兌上

咸亨利貞取女吉。

初六咸其拇。

如孤寒之士疏遠之臣。凡交情之淺者皆是。蓋欲感人而未能。求進而未遂者也。故未信而諫。聖人不與交。淺言深識者非之。○又事物未接而意見先萌。亦此爻之義。○如蘇秦初說秦王以兼天下之術。秦王不用。是咸其拇之義。

六二咸其腓凶居吉。

如隋王通詣闕獻太平十二策。文帝不能用。罷歸。通遂教授於河汾之間。是也。通初不量君之賢否。不待其求而獻策。以自取絀辱。是咸腓之凶也。後屢徵不起。弟子自遠至者甚衆。是居吉也。及卒。門人謚曰文中子。

九三咸其股執其隨往吝。

如王莽圖篡漢。當時貢符獻瑞者成羣。揚雄以名儒。亦獻秦美新。甘爲莽大夫。如朱全忠滅唐。楊師厚劉知俊輩爲之効力。苟圖富貴。固不足言。其張文蔚薛貽矩輩。素以文行著稱。乃亦甘爲逆賊佐命。卒

就唐六臣之誅。是咸股隨人也。○世之君子。位居人上。所守不正。感不以道。而反徇夫讐御臣僕在下者之私情。至於多行可愧者。皆執其隨者也。

九四。貞吉。悔亡。憧憧往來。朋從爾思。

虛中無我。則無感不通。若必人之應。則所感者有不及矣。此周而不比。比而不周。公私王霸之辨也。○如正其誼。便欲謀其利。明其道。便欲計其功。又如赤子入井之時。此心方慌。惕要去救他。又欲他父母道我好。這便是憧憧底病。

九五。咸其脢。无悔。

如絕人逃世。偏枯寂寞之士。楚狂沮溺之徒是也。○異端寂滅之學亦是。

上六。咸其輔頰舌。

如蘇秦張儀之徒。縱橫其說。文章之士。以辭說人。及女子小人。務爲諂諛皆是。

三三 震下

恆亨。无咎。利貞。利有攸往。

初六。浚恆。貞凶。无攸利。

如賈生之於漢文帝。劉蕡之於唐文宗是也。疏遯小臣。一旦欲以新開舊。難矣。○凡交淺言深。未信而諫。未信而勞其民。及責望故素。必竭其忠。必盡其歡。皆此爻之義。

九二 悔亡

事有失當而心本善，卒能救其事之失，是以中而亡其不正之悔也。○如漢周亞夫軍中夜驚，先儒謂未是節制之兵，然能靜以處之，堅臥不起，故卒定，此亦久中悔亡之意。

九三 不恆其德，或承之羞，貞吝。

此初志可觀，晚節頓改者。如漢華歆，本與邴原管寧齊名，後事曹操，至破殿壁出伏后而殺之。又如唐張文蔚、蘇循、楊涉、張策、薛貽矩、趙光逢，始以名行重於當時，及朱溫篡唐，或爲勸進，或爲奉鬻，奔走賊庭，流穢千古，何辱如之。

九四 田无禽。

凡所處非其地，所乘非其時，所爲非其分，所交非其人，皆久而無功也。○如漢武帝用王恢謀，使五將率材官三十餘萬，匿馬邑旁谷中，使聶壹詐誘匈奴入塞，欲襲擊之。匈奴得鴈門尉吏告其事，遂引兵還，是田无禽也。○如守株待兔，亦此爻象。○唐太宗以征遼左不能成功，深悔之，歎曰：魏徵若在，不使我有是行也。往返歲餘，是久非其位也。

六五 恆其德貞，婦人吉，夫子凶。

凡爲子爲臣，愚者賤者，分當從人，皆婦道也。爲父爲君，賢者貴者，當爲人所從，皆夫道也。如事有不當而專以順從爲恆，此夫子所以凶也。宋神宗之從王安石，是夫子凶也。婦人貞吉，周之太任太姜太姒。

邑姜其最也。

上六振恆凶。

常常好動如秦皇漢武及宋王安石致靖康之禍是也。

三三

艮下

遯亨小利貞。

初六遯尾厲勿用有攸往。

亂邦不居則免遯尾之厲危邦不入則无攸往之災大抵在位者宜早遯未仕者宜晦處此爻之義也。○宋紹聖初尹焞常應舉發策語不善焞曰噫尙可以干祿乎哉不對而出於是終身不就舉。

六二執之用黃牛之革莫之勝說。

宋度宗時葉夢鼎以扼於賈似道力辭相位不允乃上疏乞致仕單車宵遁○漢梅福知王莽必篡漢一朝棄妻子去不知所之逢萌掛冠都門將家屬浮海客於遼東此爻之義也。

九三係遯有疾厲畜臣妾吉。

係遯是顧戀家族妻子及權利之類而隱忍濡滯不能決去將必喪名節與身家矣係戀之私恩懷小人之女子之道也至於出處去就之大節則不容有係戀也○晉賈后專朝張華昧於亂邦不居之義委身賊后爲掌機務雖朝野暫安然終難自免是係遯有疾厲也。

九四好遯。君子吉。小人否。

君子能以道制欲。克己復禮。故絕所好以遯。小人則係於私而不能遯矣。○漢郭欽蔣詡。見王莽居攝。皆託病去官。隱居不出。班固贊曰。郭欽蔣詡。好遯不汙。絕唐紀矣。紀遂唐林唐遵。皆以明經飾行。顯名於世。後仕莽。取富貴。是小人否也。○晉裴頠薦章忠於張華。華辟之。忠辭疾不起。語人曰。裴逸民。每有心託我。然二人棄典禮而附賊后。我常恐其溺於深淵。而餘波及我。況可褰裳而就之哉。

九五嘉遯。貞吉。

五與二有應而好我。攜手同行之意。全身全節。不辱不殆。所謂嘉遯也。○嘉遯是管在位而遯。如微子

張子房是也。

上九肥遯。无不利。

肥遯是逸民。如伯夷太公。商山四皓是也。

三三 乾下
震上

大壯利貞。

初九壯于趾。征凶。有孚。

居下位而壯於進。則拂於理而忤於勢。反取困窮矣。理與威。拇浚恆同。○如唐太宗時。齊州人段志冲。上封事。請上致政於皇太子。長孫無忌等請誅志冲是也。

九二貞吉

不正未免特壯矣。然得中則宅心忠恕。能損過就中。不特壯妄爲。故得遂其進也。○如唐太宗好大喜功。然天資仁恕。志在養民。故致治之美。庶幾成康也。

九三小人用壯。君子用罔。貞厲。羝羊觸藩。羸其角。

小民專恃勇力。而不顧道義。如暴虎馮河。死而無悔。好勇鬪狠。忘身及親之類。是用壯也。君子蔑視世事。而無所忌憚。如特才妄作。變亂舊章。行己之志。違拂民情之類。是用罔也。

九四貞吉。悔亡。藩決不羸。壯于大輿之輹。

如齊桓公伐楚。師次于陘。不特壯以進。卒致楚屈。完來盟于召陵。是貞吉藩決之象。

六五喪羊于易。无悔。

如漢文帝與匈奴結和親。尉佗自立爲帝。以德懷之是也。宋孝宗與金人講和。民得休息。亦此爻之象。上六羝羊觸藩。不能退。不能遂。无攸利。艱則吉。

好進喜事。而質柔才弱。故无所利。若艱難以處之。善用其壯。則得進也。○如唐肅宗時。房琯有高志虛名。而無實才。以天下爲己任。凡事專決於冒臆。又自請將兵復兩京。悉以戎務委書生李揖。劉秩。琯軍遇賊遂大敗。是也。

晉康侯用錫馬蕃庶。晝日三接。

初六。晉如摧如。貞吉。罔孚。裕无咎。

此爻是新進之士。有人阻抑之。未見信於上。若賈生之遇絳灌是也。○又如柳下惠爲士師三黜。是摧如也。進不隱賢。必以其道。貞也。遺佚而不怨。阨窮而不憫。裕也。

六二。晉如愁如。貞吉。受茲介福。于其王母。

如宋神宗時。置司馬光於散地。帝崩。哲宗立。宣仁太后臨朝同聽政。以光爲相。甚敬任之。此先愁而後受福於王母也。呂公著文彥博亦然。

六三。衆允悔亡。

凡得衆之助。可以救其失而悔亡。故曰謀從衆。則合天心。○如魏徵本建成之臣。秦王殺建成。徵遂仕於秦王。此悔也。然秦王功大。海內屬望。英賢附從。徵竭忠直諫。爲唐名臣。則悔亡矣。

九四。晉如鼫鼠。貞厲。

德不稱其位。而有愧於心。如盜得而陰據者然。一心戀戀。常恐爲人所奪。貪而畏人。有鼫鼠之象。魯臧文仲竊位蔽賢似之。○唐玄宗時。李林甫媚事左右。迎合上意。以固其寵。妬賢嫉能。排抑勝己。以保其位。亦是。

六五。悔亡。失得勿恤。往吉。无不利。

此如宋太祖因陳橋兵變而代周。悔也。然削平僭國。天下歸心。其悔亡矣。又聰明仁孝。豁達大度。節儉愛民。保全勳舊。方寸之間。正大光明。蕩蕩平平之道。不外此矣。彷彿如是。

上九。晉其角。維用伐邑。厲吉。无咎。貞吝。

太剛則折。不可用以治人。維用之以自治。則守道愈固。遷善愈速。然過剛亦非盡善之道也。如子路好勇而不足於中和。有似於此。

三三 離上坤下

明夷。利艱貞。

初九。明夷于飛。垂其翼。君子于行。三日不食。有攸往。主人有言。

初去暗稍遠。見傷即避。其伯夷太公居海濱之事乎。

六二。明夷。夷于左股。用拯馬壯吉。

二在大臣之位。藏明於暗。傷而未切。如文王囚於羑里。散宜生之徒。進獻於紂而得釋。且命爲西伯。此爻之象也。

九三。明夷于南狩。得其大首。不可疾貞。

三與上應。以明克暗。爲武王之伐紂。然武王卽位十三年。而後大會孟津。則不可疾貞之義也。

六四。入于左腹。獲明夷之心。于出門庭。

四與上同體。避暗就明。爲微子之行。遜也。

六五。箕子之明夷。利貞。

五。近晦。爲箕子之囚奴。而能正其志也。

上六。不明晦。初登于天。後入于地。

上極暗。如紂之昏棄也。○紂君臣當時事體。无一不與明夷卦爻相似。然非因有此事而後爲此辭也。

三三 離上

家人。利女貞。

初九。閑有家。悔亡。

有家之始。立紀綱法度以防閑之。則家人守其約束條教。不至於害義傷恩矣。苟不閑之於始。則人情流放。必致有悔。○唐柳公綽在公卿間。最名有家法。公綽妻韓氏。相國休之曾孫。家法嚴肅儉約。爲縉紳家模範。○宋浦江義門鄭氏。凡子孫娶婦三日。家長以家規授之。令其謹守勿失。又以房匾授之。使其揭於房闥之外。以爲出入觀省。得閑於始之道矣。

六二。无攸遂。在中饋。貞吉。

孔子曰。婦人伏於人也。是故無專制之義。有三從之道。事無擅爲。行無獨成。無所敢自遂也。教令不出閨門。事在饋食之間而已矣。○孟母曰。婦人之禮。精五飯。羶酒漿。養舅姑。縫衣裳而已。故有閨門之修。

無境外之志。○詩曰：無非無儀，惟酒食是議。

九三：家人嗃嗃，悔厲吉。婦子嘻嘻，終吝。

隋王凝常居慄如也。子孫非公服不見閨門之內。若朝廷然。○宋呂申公居家簡重寡默。夫人性嚴有法。雖甚愛榮公。然教公事事循蹈規矩。甫十歲。祈寒暑雨。侍立終日。不命之坐。不敢坐也。及榮公娶夫人張氏。其母卽申國夫人姊也。來視女。見舍後有鍋釜之類。大不樂。謂申國夫人曰：豈可使小兒輩私作飲食。壞家法耶。其嚴如此。○治家過嚴。雖於人情不能無傷。而家道齊肅。其家必興。若笑樂無節。則廢法度。亂倫理。安能保其家乎。

六四：富家大吉。

務本以生財。撙節以致用。所以能富其家也。禮義生於富足。非大吉乎。○富家如陶朱猗頓之流。又如漢文景恭儉重農。當時府庫充滿。人給家足是也。

九五：王假有家。勿恤吉。

以聖賢之君。而得聖賢之后妃。如周文王之得太姒。上可以配至尊而主宗廟。下可以宜家。人而及邦國也。王季之娶太任。武王之娶邑姜。漢明帝之立馬后。唐太宗之於長孫皇后。皆此爻之象。

上九：有孚。威如。終吉。

心有誠信。以篤其恩義。則无家人嗃嗃之悔。身爲儀範。以正其倫理。則無婦子嘻嘻之吝。此正家久遠。

之道也。唐之柳公綽、宋之呂申公、李宗諤，皆得之。如唐張公藝，專以忍爲務，未盡善也。

三三 離上

睽小事吉。

初九，悔亡，喪馬，勿逐，自復，見惡人，无咎。

正應者，父子君臣兄弟是也。如劉備之於孫權，本非正應，以曹操南下，孫劉皆危，於是同心戮力以制之，是悔亡喪馬自復也。及孫權妻之以妹而人吳，亦見惡人以避咎也歟。

九二，遇主于巷，无咎。

如周公遭四國流言，成王不能無疑，是亦睽之時也。周公告二公曰：「我之不避，我無以告我先王。」公避居東都二年，罪人斯得，公又爲鷓鴣之詩以貽王。及金縢之啓，王乃迎公以歸，是亦遇主於巷之意。

六三，見輿曳，其牛掣，其人天且劓，无初有終。

如見迫於他人而爲上所疑，後終得合也。○又如晉王敦恃功驕恣，元帝畏而惡之，王導亦漸見疏外，及敦作亂，導詣臺待罪，周顗申救之，帝命還導朝服，召見，遂以導爲大都督，右僕射，是先疑而後得合也。

九四，睽孤，遇元夫，交孚，厲无咎。

如許遠之與張巡，本非統屬，各自孤守一城，同心爲國，彼此推誠，戮力捍賊而相合，是睽孤遇元夫交

孚也。○如晉劉琨與段匹磾，本是非類，歃血同盟，翼戴晉室，乃以子羣之書爲匹磾所得，琨遂被殺，可見睽之時，若非危厲，難於免咎也。

六五悔亡，厥宗噬膚，往何咎。

如成王之幼稚而任周公，故能興盛王之治。劉禪之昏弱而任孔明，故將有中興之勢也。

上九睽孤，見豕負塗，載鬼一車，先張之弧，後說之弧，匪寇婚媾，往遇雨則吉。

如唐德宗時，太子蕭妃母厭禱，上疑其與聞，欲廢之。李泌救解，後悟謂泌曰：「太子仁孝，無他也。」又如漢蕭何請上林空地，令民得入田，高帝疑其受賈人之金，下廷尉械繫之。王衛尉諫赦何，稱何爲賢相，彷彿此爻之義。○此卦初與四、二與五、三與上，俱當兩爻參看，則其義益明。

三三 艮下坎上

蹇，利西南，不利東北，利見大人，貞吉。

初六往蹇來譽。

漢桓帝時，處士徐穉，姜肱、袁閎、韋著、李曇，徵之不至。又徵魏桓，其鄉人勸之行。桓曰：「使桓生行死歸，於諸子何有哉？」遂隱身不仕。○古人生亂世，無官守之責，類皆高蹈遠引，以待天下之清，卒之身名俱高，傳播萬世，與夫履富貴而蹈危機，以致身名俱仆，爲後世笑者，有間矣。

六二王臣蹇蹇，匪躬之故。

諸葛孔明曰。臣鞠躬盡瘁。死而後已。至於成敗利鈍。則非臣之明所能逆覩也。其二之謂歟。文天祥亦然。

九三往蹇來反。

如定公初年。季氏強僭。陽虎作亂。故孔子不仕。而退修詩書禮樂。弟子彌衆是也。

六四往蹇來連。

如蕭何薦韓信爲大將。而漢業以成。桓溫起謝安於東山。後舉謝玄以破秦寇是也。

九五大蹇朋來。

如漢光武起兵復漢。而鄧禹耿純朱鮪馬援寇恂等二十八將。助成中興之業是也。又如昭烈當猖獗之時。信義著於四海。是其中節也。故士從之如雲。是亦朋來也。

上六往蹇來碩。吉利見大人。

如張良聚少年百餘人以屬沛公。王陵以兵數千屬漢王是也。○李密與王世充戰失利。與衆三萬歸關中。唐主使迎秦王世民於幽州。一見驚服。曰真英主也。不如是何以定亂乎。亦此爻之義也。○凡欲得君行道以濟時者皆是。

三三 坎下
震上

解利西南。无所往。其來復吉。有攸往。夙吉。

初六无咎

如光武即位之初。而卓茂素以寬仁恭愛。恬淡樂道。爲密令。視民如子。舉善而教。口無惡言。至是訪求褒封之。○又嚴光不受爵祿。耕釣於富春山中。亦此爻之象。

九二田獲三狐。得黃矢。貞吉。

如唐張柬之爲相。與崔玄暉敬暉桓彥範袁恕己等。誅張易之。昌宗是也。

六三負且乘。致寇至。貞吝。

無才德而竊據高位。如漢之呂祿呂產。晉之楊駿王戎。唐之楊國忠。元載。宋之蔡京。賈似道之類。是負且乘者也。○如漢之劉盆子亦是。

九四解而拇。朋至斯孚。

如宋元祐元年。汪觀孫覺劉摯等。極論蔡確等免之。安置呂惠卿。是時司馬光呂公著呂大防呂大臨。程頤文彥博等。皆得進用是也。

六五君子維有解。吉。有孚于小人。

如元祐初。宣仁太后臨朝。能新法。熙寧元豐邪黨皆斥退。是以陰居尊者之有解也。

上六公用射隼于高墉之上。獲之无不利。

權奸旣去。則善類獲安。故无不利。如漢王允誅董卓。百姓歌舞於道是也。

三三
艮上

損有孚。元吉。无咎。可貞。利有攸往。曷之用。二簋可用享。

初九。已事遄往。无咎。酌損之。

如孔明躬耕南陽。不求聞達。及先主三顧。遂爲驅馳盡瘁。不別治生以長尺寸。是已事遄往也。○如漢賈誼見文帝。就爲之痛哭流涕。舉生平所見。盡以獻之。豈非不能酌損量其所受。而爲可繼者乎。○或以卜式輸家財助邊。擬此爻亦可。

九二。利貞。征凶。弗損益之。

君子自守不妄進。可以啓時君尊德樂道之心。止士大夫奔競之習。是弗損乃所以益之也。如漢嚴子陵。清風高節。而使貪夫廉。懦夫立。是大有功於名教也。故曰桐江一絲。繫漢九鼎。

六三。三人行。則損一人。一人行。則得其友。

兩相與而不容以三。如天地絪縕。萬物化醇。男女構精。萬物化生。蓋其本旨也。如人臣無外交。無二心。婦人從一而終。子不可謂他人父。及任賢勿貳。任將必專之類。皆此爻致一之義也。○凡以兩致一者。皆一陰一陽也。初二雖皆二陽。然初陽而二陰。四五雖皆陰。然五陽而四陰。此以比爻言。若上陽而三陰。以應言也。六三乃卦之所以爲損者。故於此言之。

六四。損其疾。使遄有喜。无咎。

此以友輔仁從善克己之道。惟速則善學如不及。過則勿憚改也。能如是。雖柔必強矣。蓋學問之道無他。知其不善。則速改之以從善而已。○書曰。沈潛剛克。亦此爻義。

六五。或益之。十朋之龜。弗克違。元吉。

柔順如堯之克讓。舜之溫恭。文王之微柔懿恭也。虛中是小心翼翼。不自滿假。文王望道未見之心也。以是履帝位而不疚。凡有血氣。莫不尊親。故或有意外之費。民皆樂於共輸也。

上九。弗損益之。无咎。貞吉。利有攸往。得臣无家。

不待損己以益人。如漢文帝承高惠豐積之厚。而屢下賜民田租之詔是也。若惠而不貞。如梁惠王所移。特民間之粟。漢桓帝令民鑄錢以賑饑。宋王安石散青苗錢之類。民受實惠者少矣。豈能得臣无家乎。

䷩ 震上

益。利有攸往。利涉大川。

初九。利用爲大作。元吉无咎。

居下者。於常祿之外。受上之賜。若魏徵之受金璽。受捐帛於太宗之類。既受上益。則於國家生民大利病者。當建白於上。有大作爲。又必大善而吉。然後其咎可免。若漢賈誼陳治安策。不量淺深。以致絳灌之徒不悅。而生讒謗。其事遂爲所阻。是未能元吉。故不免於有咎也。○凡子之於父。臣之於君。僚屬之

於官長皆不可踰分越職。自求任厚。事縱可爲。亦須是盡善。方能無過耳。

六二。或益之。十朋之龜。弗克違。永貞吉。王用享于帝。吉。

虛中則不自滿。假處下則卑以自牧。臣德之極盛者也。若禹之不矜不伐。周公之孫碩膚是已。故名位寵祿。羣然並至。卽以此虛中之誠而享帝。祭則受福。況於人乎。

六三。益之用凶事。无咎。有孚中行。告公用圭。

如無才德者。上之人投之險阻艱難之中。置之利害憂患之途。使之勞筋苦骨。困心衡慮。於以動其心而忍其性。成其德而達其材。是雖凶事。實益之也。受此益者。必存心至誠。行合中道。然後可以告於上以通信。而有以慰其責望之意矣。○如漢淮南王謀反。文帝廢之。徙處蜀郡。本欲困苦之。是益之用凶事也。王憤恚不食而死。是終不能有孚中行。告公用圭者也。

六四。中行。告公從。利用爲依遷國。

告公從。上信之也。利用爲依遷國。下信之也。皆以益下中行故也。○盤庚遷殷。在避水患。太王遷岐。以避狄人。所以益下也。此爻如漢張良。高祖平日言聽計從。及婁敬發遷都關中之議。帝問張良而後決是也。關中左穀函。右隴蜀。阻三面而固守。獨以一面東制諸侯。省冗兵繁費。蓋終西漢之利。其爲益下也大矣。然非張良主張欲遷。則誰與爲依哉。

九五。有孚惠心。勿問。元吉。有孚惠我德。

如堯舜禹湯文武之爲君。愛民如子。而兆民允懷。亦視之如父母。所謂未有好仁而不好義者也。上九莫益之。或擊之。立心勿恆凶。

以剛求益不已。人所共惡者也。夫子曰。放於利而行多怨。孟子謂先利則不奪不廢。聖賢之深戒也。故暴君以聚斂失民。權臣以貪賄而致禍者。不可勝數也。

三三

乾下兌上

夫。揚于王庭。孚號有厲。告自邑。不利卽戎。利有攸往。

初九壯于前趾。往不勝爲咎。

唐處士韋月將上書告武三思。潛通宮掖。必爲逆亂。中宗大怒。流而斬之。宋陳東歐陽澈上書論黃潛善汪伯彥。潛善激高宗殺之。以布衣而論權臣。不量力之甚。其咎宜也。○漢京房欲去恭顯。而卒困於恭顯。唐劉蕡欲去宦官。而卒困於宦官。皆不勝爲咎也。○宋婺州處士呂祖泰上書乞斬韓侂冑。寧宗詔配祖泰於欽州。亦壯趾爲咎者也。

九二惕號。莫夜有戒。勿恤。

如漢陳平當諸呂得志之時。燕居深念。乃交驩周勃以誅諸呂。唐狄仁傑孤立存唐。乃密結五王。以去二張。得惕號之義矣。蓋惕則謀深。號則類集。故有戎勿恤也。

九三壯于頄。有凶。君子夬夬。獨行遇雨。若濡有愠。无咎。

晉王敦有異志。忌溫嶠被帝親任。請爲左司馬。嶠乃繆爲勸敬。時進密謀。深結錢鳳。及至建康。盡以逆謀告帝。與庾亮劃計討之。此與壯于頄者異矣。○漢王允之與董卓。屈志彌縫。卓亦雅信焉。後用呂布以誅之。唐顏杲卿迎安祿山。受其衣服。後借兵以伐之。亦此類。但非正應耳。

九四。聲无膚。其行次且。牽羊悔亡。聞言不信。

如人心欲進。而才不足以有爲。惟因人成事。則能遂其進而悔亡。然以不中正。故不信此言也。○春秋時。小國從齊桓晉文。而有戰伐之功。是牽羊悔亡。若其獨往。未免行次且矣。

九五。莧陸夫夫。中行无咎。

魯莊公問嗣公子牙欲立慶父。廢子般。季友以君命使人酰牙。不直誅以全兄弟之親。此夫夫中行也。○此爻大意。與九三相似。但九三以君子應小人。而在臣位者。此爻以君子比小人。而在君位者。微不同。其決而和則同也。○唐文宗惡宦官王守澄等。專橫不能制。密與學士宋申錫言之。申錫請漸除其僭。昭宗疾宦官宋道弼等。與崔胤謀去之。王搏曰。宦官擅權。其勢不可猝除。宜候多難。漸平。以道消息。願陛下言勿輕泄。致速姦變。此得中行之義矣。○宋神宗以人言而罷王安石。是中未光也。故不久復用。

上六。无號。終有凶。

如漢袁紹捕殺趙忠等。及諸宦者二千餘人。張讓後亦投河死是也。○舜攝位。進元愷而誅四凶。小人

之類盡矣。

三三 巽下
乾上

姤女壯勿用取女。

初六繫于金柅貞吉有攸往見凶羸豕孚蹢躅。

如漢和帝時宦官用權自鄭衆始鄭衆謀誅竇憲策勳封賞辭多受少是繫于金柅者也然開端作俑爲漢世大患安順桓靈之世寺人之寵日盛爲害愈深是羸豕孚蹢躅也曹節王甫趙忠張讓之徒無一能全其首領者是有攸往見凶也○如唐武宗時李德裕爲相近倖帖息畏服若無能爲者而不知其志在求逞也其後繼嗣重事定於其手而德裕逐矣是羸豕孚蹢躅也○吾心私欲竊伏及其滋長則滅天理有甚於羸豕之可畏者幾微之間所當深察也。

九二包有魚无咎不利賓。

如唐高宗初立以李義甫爲中書舍人長孫無忌惡之奏斥壁州司馬是包有魚也義甫於是請立武昭儀爲后復留未幾爲相義甫柔恭陰賊凡忤意者皆中傷之則不利賓矣○宋丁謂爲寇準拂鬚時在其管轄中是包有魚也寇準不能制反從而進之焉卒之其身不能自保是昧於不利賓之義也。

九三臀无膚其行次且厲无大咎。

唐玄宗時詔天下士有一藝者皆得詣闕就選李林甫恐士對詔或斥已故無一中程者夫就選求遇。

臀无膚也。不中程式。行次且也。然終免於林甫妬賢嫉能。排抑勝己之禍。是雖厲而无大咎也。凡亂世小人用事。士之求遇而不得者。未必非福。亦可見矣。

九四。包无魚起凶。

此爻如男之失其配。君之失其民也。○如失道者寡助。以致於親戚叛之而難作。桀紂爲湯武毆民之類是也。

九五。以杞包瓜。含章。有隕自天。

此爻是衆君子之領袖。不作君位說。含章是用意周密。不動聲色。而有以消患於方萌也。○如漢陳平周勃之誅諸呂。唐狄仁傑之制諸武。是能含章而回造化者也。

上九。姤其角。吝。无咎。

凡隱士多剛亢自高。不能與時俯仰。故與人落落難合。然小人殘害君子之禍。亦莫之及矣。楚狂接輿之類是也。

三三三
兌坤下

萃。亨。王假有廟。利見大人。亨。利貞。用大牲吉。利有攸往。初六。有孚不終。乃亂乃萃。若號。一握爲笑。勿恤。往无咎。

如齊桓公會諸侯。盟于首止。以定王世子。鄭伯逃歸不盟。有孚不終也。蓋王命鄭伯從楚叛齊。是乃亂

乃萃也。後三年齊會諸侯盟于洮，以謀王室之難。鄭伯乞盟，是往无咎也。

六二引吉无咎，孚乃利用禴。

此引其類以萃於朝，大臣以人事君之道也。如舜之舉元愷，宋司馬光薦程伊川之類。六二中正，故所引者亦不可以不正者言也。若不正之小人，則不當引矣。

六三萃如嗟如，无攸利，往无咎，小吝。

如人近於強盛有權位者，而不得合，不若歸其故舊之微弱者。雖小吝而无咎也。○如黎侯失國而寓於衛，衛之諸臣靡所與同，其臣勸之曰：「式微，式微，胡不歸？彷彿似此。」

九四大吉无咎。

居大臣之位，得君民之萃，必以正道，然後无咎。若佞臣之容悅，小人之聚斂以得君，如齊之陳恆、魯之季氏，厚施干譽以得民，則非大吉，不能无咎矣。

九五萃有位，无咎，匪孚，元永貞，悔亡。

如舜卽位，羣后咸覲，是萃有位无咎也。獨三苗負固不服，命禹征之，而猶逆命，乃班師，誕敷文德，有苗來格，是匪孚，元永貞，悔亡也。

上六齎咨涕洟，无咎。

凡無所爲而勢孤者，若知戒懼，雖不萃猶可自保，雖不得利猶可無害，故孤臣孽子，所宜操心危而慮

患深也。

䷁

震上坤下

升元亨。用見大人。勿恤。南征吉。

初六。允升大吉。

如子賤能尊賢取友。則允升於道德者。大夫僕與文子同升諸公。則允升於爵位者。皆順乎陽之所致也。

九二。孚乃利用禴。无咎。

至誠感神。故祭則受福。誠能動物。以仕則得君。此爻之義。總是誠實以上交也。亦見升意。

九三。升虛邑。

剛正有應。前虛無阻。其升之易。如入無人之邑。如舜之玄德升聞。乃命以位。傳說之爰立作相。置諸左右是也。

六四。王用亨于岐山。吉。无咎。

人積其誠意。以事鬼神。有升而上通之義。此爻是文王武王爲諸侯時。祭封內山川之事。周公繫爻辭。追稱爲王耳。未必是說天子望秩之祭。若旣爲天子。則其誠意所通。又有大於此者矣。如王用享於帝是也。

六五貞吉升階

六五已居君位其升乃治道升于大猷也如太甲初不惠于阿衡非貞也其後既受伊尹之訓令德克終則治道允升而匹休前烈是能貞則吉而升階矣

上六冥升利于不息之貞

冥升者汲汲於外所謂孳孳爲利求在外者也不息之貞者汲汲於內所謂孳孳爲善求在我者也蓋君子爲善惟日不足小人爲不善亦惟日不足也冥升是象占者若能變易以從道則惟狂克念亦可作聖故曰利于不息之貞則冥升之不利亦可見矣○存疑曰嘗見同僚有求遷職不得而氣死者真無益矣所謂消不富者言徒有損而無益也

三三兌下

困亨貞大人吉无咎有言不信

初六臀困于株木入于幽谷三歲不覿

陰柔困甚難安不見天日如罪人之久於囹圄桎梏放臣之終於流蔡拘囚是也

九二困于酒食朱紱方來利用亨祀征凶无咎

有剛中之德處困時而上應之是高爵厚祿以紮維其身而君復責成之殷如周公親遭大變破斧缺斨之時屈折調護心勞力瘁孔明值運移漢祚難恢復志決身殲軍務勞可見其困處○朱紱方來如

文王遇太公於渭水。先主見孔明於隆中是也。○當困之時。誠一切至。可通神明。不必急於往也。
六三。困于石。據于蒺藜。入于其宮。不見其妻。凶。

如秦苻堅伐晉。爲謝玄等所敗。諸軍皆潰。是困于石也。歸仍寵信慕容垂姚萇。是據于蒺藜也。垂自稱燕王。萇自稱後秦王。堅爲萇所執。幽於別室而縊殺之。是入于其宮。不見其妻而凶也。○此爻居二陽之間。不中正而又無應。不善處困而益困者也。

九四。來徐徐。困于金車。吝。有終。

如漢蘇武使匈奴。不肯降。幽武置大窖中。絕其飲食。武齧雪吞毛。後徙北海上牧羊。留匈奴十九年。而後得歸。是來徐徐。困于金車。雖吝而有終也。宋洪皓使金。粘沒喝逼之使仕。劉豫皓不屈。將殺之。一校爲跪請。得流遞冷山。十五年而還。高宗謂其忠貫日月。志不忘君。雖蘇武不能過也。

九五。劓刖。困于赤紱。乃徐有說。利用祭祀。

如漢宣帝初立。霍光權重。帝嚴憚之。霍光驕乘。背若負芒刺。許后爲光妻所弑。而立其女爲后。是劓刖困于赤紱也。乃光薨。帝勵精爲治。霍顯與諸子驕橫謀廢帝。事覺伏誅。是後吏稱民安。乃徐有說也。○剛中是內積誠意。上交於神。故利用祭祀。○存疑曰。困于赤紱。如漢獻帝之遷於曹操。魏高貴鄉公之受制於司馬。則富貴適足爲身累也。

上六。困于葛藟。于臲臲。曰動悔有悔。征吉。

以才弱處時之窮。欲動則纏束於葛藟。而不能動。欲靜則危動於輓旒。而不能安。如周赧漢獻之類是也。若占者能自振奮。而柔濟以剛。則征吉。此周公教人遷善以救困之道也。

三三 巽下坎上

井。改邑不改井。无喪无得。往來井井。汔至。亦未繙井。羸其瓶。凶。

初六。井泥不食。舊井无禽。

此如人品汙下。不能自強於爲善。而才德不足以及物。无用於世。爲人所棄者。觀於此爻。當知所免矣。九二。井谷射鮒。甕敝漏。

如人有才德。而上無汲引之人。下比卑賤之交。故其功不上行。無能及人。如顏子之隱而未見者也。○存疑曰。上無當路之汲引。下與鳥獸同羣而已。故以井言。則爲井谷射鮒。以汲井言。則爲甕敝漏。九三。井渫不食。爲我心恻。可用汲。王明。並受其福。

如有才德之人。而未爲時用。故他人爲之惻然曰。安得王明而上下並受其福乎。是知伊尹非成湯之三聘。則爲莘野之耕夫。傳說非高宗之旁求。則安於傅巖之版築而已。鳳鳥不至。河不出圖。此夫子所以有吾已之歎也。

六四。井甃无咎。

此所謂宗族稱孝焉。鄉黨稱弟焉。本立而才不足者。又如漆離開求自信而不遽求仕。亦此義也。

九五井冽泉食。

德修於身而澤被天下。此堯舜禹湯文武之德業。所以爲盛大也。

上六井收勿幕。有孚元吉。

此君子有實德。而其施不窮。如臯陶邁種德。而四方有風動之休。禹修六府三事。而萬世賴平成之功。是也。伊傅周召德施之普皆然。

三三 兌上

革。巳日乃孚。元亨利貞。悔亡。

初九鞶用黃牛之革。

中順就革道言。只是安常守分。凡事且仍舊之意。如孔子不能革春秋之弊。而常爲委吏乘田。不出位而曠職。孟子不能革戰國之弊。然無官守言責。故進退有餘裕。是固守中順之道者也。○又如文王三分有二以服事殷。武王於鑠王師。遵養時晦。亦是。

六二巳日乃革之。征吉无咎。

有德有位有應。猶必巳日乃革。寧詳緩。无急遽。故吉而无咎。言宿弊去而新利興也。如司馬光欲罷新法。先開言略是也。○巳日議革之巳日。必議定而後革。則吉也。

九三征凶。貞厲。革言三就。有孚。

征凶貞厲。躁於革則不可也。革言三就有孚。審於革則可也。躁於革者。如秦商鞅廢井田。罷封建。宋王安石變舊章。行新法是也。審於革者。如周公監二代而制禮。沛公除秦苛政。約法三章。天下既定。乃命蕭何次律令是也。

九四。悔亡。有孚。改命吉。

如宋神宗既崩。宣仁太后臨朝下詔。改王安石所立新法。以司馬光爲相。凡欲革而未定者。一一舉行之。民歡呼鼓舞稱便。是悔亡改命吉也。初光居洛十五年。天下以爲真宰相。及神宗崩。赴闕入臨。軍民遮道聚觀。皆曰。願公無歸洛。留相天子。活百姓。是有孚在改命之前。故悔亡而吉也。○此改命。謂改政令。非革命也。革命屬九五事。

九五。大人虎變。未占有孚。

自新新民之極。所謂所過者化。所存者神。舉一世而甄陶之。非徒小補而已。以處常之大人言。堯舜之黎民於變時雍。四方風動是也。順天應人之時。所謂改正朔。易服色。立制度。新視聽。以虎變之大人言。湯武之爰革夏命。乃反商政是也。○未占有孚。必如成湯。未革夏命。而室家已相慶於來蘇之先。乃應此占也。

上六。君子豹變。小人革面。征凶。居貞吉。

革道已成。如周成康之世。君子豹變。和順積中。英華發外。如彼都人士。其容不改。出言有章也。小人革

面雖未能革心。而勉強從令。所謂民免而無恥者。如有虞苗之來格。象之烝。又是也。上六之才。如成康之君。只可守成。末可責以開創之功也。○革不可以過。才不可以行。居貞則吉。如曹參守蕭何之法。載其清靜。民以寧一是也。征凶。如王莽性躁。不能有爲。乃更漢制度。勳欲慕古。不度時宜。制又不定。吏緣爲姦。天下瞽瞍是也。

三三 巽下離上

鼎元吉亨。

初六。鼎顛趾。利出否。得妾以其子。无咎。

如管仲之舉於市。孟明勝敵於囚虜之餘。是因敗以爲功。鼎顛趾利出否也。韓信舉於行陣。陳平拔於亡命。是因賤以致貴。得妾以其子也。○朱子曰。此爻本不是好底。只是偶然如此。因禍致福。所謂不幸中之幸也。

九二。鼎有實。我仇有疾。不我能即。吉。

有德之君子。密比小人。能謹其所守。而不爲所浼。則吉。如陽貨欲見孔子。且諷使速仕。而孔子遠之。季氏使閔子騫爲費宰。而閔子騫辭之是也。○此爻與屯六二相似。○公孫述稱帝於成都。徵李業王皓王嘉皆不就。而自殺。聘譙玄。玄不詣。費貽不肯仕。述漆身爲癩。佯狂以避之。任永馮信皆託青盲以辭徵命。光武平蜀。表李業之閔。祠譙玄以中牢。徵費貽任永馮信。會永信病卒。獨貽仕至合浦太守。

九三鼎耳革其行塞。雉膏不食。方雨虧悔終吉。

如賢者過於剛介。不從虛中之君。而從遯世之士。則抱負不施於用。膏澤不下於民。然所守本正。君必求之。而終與之相遇。故吉也。○晉謝安累徵不就。寓居會稽。以山水文籍自娛。人皆以公輔期之。至曰安石不出。當如蒼生何。後桓溫請爲司馬。歷官至宰相。從容以消桓溫之心。談笑以折苻秦之竊。功業可比於王導。有此爻之象。

九四鼎折足覆公餗其形渥凶。

此爻正所謂大臣誤陛下。而大臣所用者誤大臣也。唐肅宗任房琯。而房琯任劉秩。安得不敗於賊將安守忠乎。

六五鼎黃耳金鉉利貞。

如舜德溫恭。而任賢不貳。及太甲之於伊尹。成王之於周公之類是也。

上九鼎玉鉉大吉无不利。

人剛而能溫。則無所處而不當。詩曰。不競不綏。不剛不柔。敷政優優。百祿是遘。此之謂也。○如周公召公成周之玉鉉也。又成王命畢公保釐殷士。而曰不剛不柔。厥德允修。又曰。惟公克成厥終。合于此爻之義。

震亨震來虩虩笑言啞啞震驚百里不喪匕鬯。

初九震來虩虩後笑言啞啞吉。

人能恐懼則先震而後定先恐而後安如周宣王遇災而懼卒致中興堯舜兢兢業業成功巍巍是也。

六二震來厲億喪貝躋于九陵勿逐七日得。

如周公遭流言之變而避位居東後成王迎公以歸詩人謂之公孫碩膚德音不瑕是也又如沛公先入關頂羽怒攻之沛公懼見羽鴻門羽違約王沛公於漢中沛公養賢致民卒還定三秦亦此爻之象。

六三震蘇蘇震行无眚。

如唐明皇遇安祿山之亂而奔蜀是震蘇蘇也肅宗用靈武之師能收復其京邑是震行无眚也。

九四震遂泥。

如晉元帝困於五胡宋高宗終不能恢復中原是也。

六五震往來厲億无喪有事。

如漢順帝時閹宦弄權梁氏有事是震往來厲也然帝慈和好士進用賢良是无喪有事也宋理宗時元滅金夏威震海內彌遠似道起釁結禍是震往來厲也然理宗秉德遵業慎終如始崇尚周程張朱義理之學是无喪有事也。

上六震索索視矍矍征凶震不于其躬于其鄰无咎婚媾有言。

如人備患无素。及禍之來。則志氣消索。視瞻徊徨。內先自亂。而无以御事變。其凶必矣。若能圖之於早。先事而備。則无此咎。然以陰柔居震極。處事之疏。或未滿乎人意。故婚媾不免有言也。○震不于其躬者。制治于未亂。保邦于未危。上醫醫於未病之先是也。○漢後主時。不意魏兵卒至。不爲城守調度。及鄧艾自陰平。鑿山通道。進入平土。百姓擾亂。君臣貽降。而漢亡矣。若早聽姜維。聞鍾會治兵。欲規進取。宜遣張翼。廖化督諸軍。分護陽安關口。及陰平之橋頭。以防未然之計。則未遽至此也。爻義似之。

三三 艮上

艮其背。不獲其身。行其庭。不見其人。无咎。

初六。艮其趾。无咎。利永貞。

才弱位卑。止而不進。則无咎。又必利於固守也。如漢樊英。安帝徵之不至。順帝徵之就聘。及後應對。無奇謀深策。談者以爲失望。是雖艮止於初。而未能永貞於終者也。

六二。艮其腓。不拯其隨。其心不快。

腓最易動。而能止之。是人臣之守身者。不失乎中正矣。然立於人之朝。諫不行。言不聽。不能拯其所隨之失。則是危而不持。顛而不扶。於心安乎。故其心不快也。如宮之奇。儒則不能彊諫。而虞公卒受晉假道之賂。宮之奇以其族行。後晉滅虢。遂滅虞也。○凡臣之於君。弟之於兄。僚屬之於官長。皆有不拯其隨。其心不快之義。

九三。艮其限。列其夤。厲薰心。

如人之執一不通。行止失宜。以致事勢乖離。人心睽隔。而憂心內結者。若繇方命圯族。悻直以亡身是也。○又如學者卻動求靜。心必不靜。亦此爻之義。

六四。艮其身。无咎。

如人安靜而韜晦。事未可爲。便退縮不爲。又如鄉鄰鬪而閉戶。曾子不與沈猶行之難。皆艮其身者也。六五。艮其輔。言有序。悔亡。

如商高宗三年不言。言乃雍。孔子稱閔子騫。夫人不言。言必有中。又曰。吉人之辭寡。仁者其言也訥。是也。○艮其輔。謹言也。謹言者。非不言也。時然後言。言有序也。有序謂中乎義理之次第也。悔謂傷易則誕。傷煩則支。已肆物忤。出悖來違也。

上九。敦艮。吉。

愈久不變。物莫能奪。乃爲敦艮。如君子無終食之間違仁。造次必於是。顛沛必於是。富貴不能淫。貧賤不能移。威武不能屈是也。

三三。艮上

漸女歸吉利貞。

初六。鴻漸于干。小子厲。有言无咎。

如賈誼始進漢廷文帝問之絳灌之徒譖之於帝謂洛陽少年專事紛更。是小子厲有言也。誼雖以是取困。然於名義何損哉。是无咎也。

六二鴻漸于磐飲食衎衎吉

德稱其位故居之安得君盡職食祿無愧凡賢才被知遇而進於卿相如商之伊傅唐之房杜姚宋之類皆是。

九三鴻漸于陸夫征不復婦孕不育凶利禦寇

過剛則質性剛忿不中則行事乖方无應是莫有救正之者有冥行失勢之理如項羽之強暴而自刎烏江董卓之悖逆而躋燈照市凶何如哉過剛不中而无應在夫婦皆不利惟禦寇則過剛乃可以防患耳。

六四鴻漸于木或得其桷无咎

如以善弱之資偶遇艱險之人或艱險之地艱險之事而能巽順以處之始雖不安而終可无虞也如孔子之於桓魋則微服過宋而要殺無所施其遇陽貨則巽言隨答而權姦莫能屈是也。

九五鴻漸于陵婦三歲不孕終莫之勝吉

如宋神宗初欲大用司馬光爲王安石呂惠卿所阻尼光居洛十五年修資治通鑑上之帝降詔獎諭元祐初王安石邪黨罷黜以光爲相有此爻之象。

上九鴻漸于陸。其羽可用爲儀。吉。

如賢達之高致。出塵寰之外。雖其實德不爲人用。然清風高節。猶足以廉頑而起懦。周之夷齊。漢之嚴光。是也。

三三兌下

歸妹。征凶。无攸利。

初九。歸妹以娣。跛能履。征吉。

此爻以臣道言。如賈誼爲梁太傅。董仲舒爲江都相是也。以婦道言。如唐太宗之徐惠妃。宋眞宗之楊淑妃是也。

九二。眇能視。利幽人之貞。

如唐陸贄之事德宗。宋李綱之事高宗是也。不能成大功。而終見擯斥。是守正而不偶也。

六三。歸妹以須。反歸以娣。

不正之女。待嫁不得。而反歸爲娣。是自賤也。夫人志在祿位。欲速好適。而甘於卑下。卒爲人賤者。可以異此哉。如黃巢粗涉書傳。屢舉進士不第。遂聚衆千人爲盜。應王仙芝與之剽掠州縣。又其汙悖者也。

九四。歸妹愆期。遲歸有時。

愆期以待。欲得佳配。孟光是也。如太公八十而遇文王。孔明三顧而許昭烈。亦其義也。

六五帝乙歸妹其君之袂不如其娣之袂良月幾望吉

此爻明言帝乙歸妹之事漢明帝馬貴人德冠後宮既正后位愈自謹肅常衣大練裙不加飾亦女德之盛不尚服飾者也若人君虛心下賢誠意受諫而不徒以繁文虛禮飾觀美聽亦此爻之義也

上六女承筐无實士刲羊无血无攸利

如唐太宗至魏徵第問疾指衡山公主欲以妻其子叔玉徵薨後其所薦杜正倫以罪黜侯君集謀反誅又有言徵自錄前後諫辭以示起居郎褚遂良者帝愈不悅乃罷叔玉尙主是約婚而不終者也又如齊宣王之臣昔者所進今日不知其亡亦此爻之義也

三三

離上

豐亨王假之勿憂宜日中

初九遇其配主雖旬无咎往有尙

此爻正是朋友麗澤之益又如漢之子房運籌於內韓信制勝於外及丙吉以寬治民魏相以嚴摠職唐之房杜善謀於內英衛善武於外及房玄齡之善謀杜如晦之善斷是也

六二豐其蔀日中見斗往得疑疾有孚發若吉

此如周公遭流言之時成王不能無疑公居東貽詩成王因風雷之變啓金縢得周公願代武王死之冊乃感悟迎公以歸唐郭子儀爲上將擁兵魚朝恩程元振讒謗百端肅宗代宗不能無疑屢奪其兵

柄然朝聞命夕引道。惟仗忠信安義命。无纖芥自嫌。由是讒謗不行。得此爻之義矣。

元三豐其沛。日中見沫。折其右肱。无咎。

賢智之才。遇明君。則能有爲於天下。上无可賴之主。則不能有爲。如人之折其右肱也。然非我之過。故曰微明。陽之帝堯。則大舜雷澤之漁父耳。微明。哲之高宗。則傅說巖野之青靡耳。然在位而不得行其道。如漢元帝殺蕭望之。宋欽宗高宗用李綱。不久而罷。亦是也。

九四豐其蔀。日中見斗。過其夷主吉。

上無明君。不能濟大事。下有同德。亦可稍行其志。如文王當紂之時。與太公閎散之徒。協力國事。猶可支持。晉張華裴頠。當惠帝之初。同心輔政。雖閹主在上。而朝野安靜。晉南渡。元帝柔弱。不足有爲。祖逖周顒之徒。同心共濟。亦足以維持萬一也。

六五來章。有慶譽。吉。

人君雖柔闇。賢明君子。天下固多。惟在舍己從人。則安身而國家可保也。如衛靈之無道。用仲叔圍祝鮀。王孫賈。尚不至於喪。漢後主委任孔明。猶可以與魏抗衡。況來致天下之明者乎。

上六豐其屋。蔀其家。闕其戶。闕其無人。三歲不覿。凶。

假滿躁動。察察以爲明。適足以自蔽而已。如桀紂是也。又秦始皇隋煬帝皆是。漢武帝若非賞罰嚴明。又有輪臺之悔。同歸於无人不覿之凶矣。○此爻辭與明夷上六相似。皆暗之極。但彼之暗足以傷人。

卒至自殞厥命。此之暗只自障蔽耳。

三三 艮下
離上

旅。小亨。旅貞吉。

初六。旅瑣瑣。斯其所取災。

柔弱之人處旅。志意汙下。而規模局促。此所以取災咎也。蓋人必自輕而後人輕之也。詩曰。瑣兮尾兮。流離之子。初六有焉。

六二。旅即次。懷其資。得童僕貞。

如孔孟周流列國。所至君臣館而禮之。以有中正之德故也。

九三。旅焚其次。喪其童僕。貞厲。

如唐玄宗幸蜀。至馬嵬驛。將士饑疲。皆憤怒。殺楊國忠。衆欲散去。此焚次喪僕之厲也。○魯昭公爲季氏所逐。出居于鄆。其從者士芥視民。民不能堪。鄆遂潰叛。公從此創迹於魯。而客寄乾侯。其失與下之道者乎。

九四。旅于處。得其資斧。我心不快。

用柔能下。人莫不悅。故旅得其地。而有以自防。然非其正位。處事或失其當。惟陰柔之應。羣伴不得其人。故心不快也。○宋高宗罷李綱。金兵益盛。帝如揚州。是旅處得資斧也。宗澤上疏建議。輒爲黃潛善

汪伯彥所抑。是上無剛陽之與。下惟陰柔之應。然高宗未嘗以此不快。可謂暗矣。若非宗澤力請還京。則信王渡河入汴矣。

六五。射雉。一矢亡。終以譽命。

人所行能。中文明柔中之道。則雖有羈旅之小費。而終有功名之大得。如南陽鄧禹。杖策追劉秀。及於鄴。秀曰。生遠來。寧欲仕乎。禹曰。願得效其尺寸。垂功名於竹帛爾。彷彿此爻之義。

上九。鳥焚其巢。旅人先笑後號咷。喪牛于易凶。

號咷從焚巢來。先笑從驕亢來。喪牛于易凶。又釋由驕亢而致號咷之故。處旅只宜柔順謙卑。一有驕亢。鮮不爲害。

三三 巽下

巽。小亨。利有攸往。利見大人。

初六。進退。利武人之貞。

如冉有資稟柔弱。於所當行者。逡巡畏縮。而爲之不勇。故嘗自謂力不足。是進退也。夫子告以聞斯行之。使之勇決而往。以濟其不及。是利武人之貞也。以剛克柔。則柔而立矣。故曰求也退。故進之。此長善救失之道也。

九二。巽在牀下。用史巫紛若。吉。无咎。

居下不安而過巽。又用人以道達誠意。然亦不至於失中。故无咎。如泄柳申詳。無人乎繆公之側。則不能安其身近之。

九三頻巽吝

勉爲巽者。非出於誠心。則不可久。故頻失而頻巽也。堯之允恭克讓。文王之徽柔懿恭。孔子之溫良恭儉讓。則盛德光輝。自然發越。頻巽之吝。不亦宜乎。

六四悔亡田獲三品

如人才弱无授。與強暴者雜處。而用柔能下。則非但免於侵陵。而彼反爲我助。所求必得矣。故曰。君子敬而無失。與人恭而有禮。四海之內。皆兄弟也。又曰。言忠信。行篤敬。雖蠻貊之邦行矣。此之謂也。

九五貞吉悔亡无初有終先庚三日後庚三日吉

五爲申命之主。其德本善。但居巽體。未免有苟且偷安之悔。然終能奮勵改圖。丁寧揆度。有詳審精密之思。爲深長久遠之計。則得其貞。而吉利有終矣。○漢明帝元年。東平王蒼以爲中興三十餘年。四時無虞。宜修禮樂。乃以公卿共議。定南北郊冠冕車服制度。及光武廟登歌八佾舞數。上之二年。上臨辟雍行大射養老之禮。東都文物彬彬可觀。彷彿此爻之象。

上九巽在牀下喪其資斧貞凶

漢元帝優游不斷。漢業遂衰。是過巽喪斧而凶也。

三三兌下

兌亨利貞

初九和兌吉

不柔媚不上求。又無私係。得說之正。和而不流。亦和而不同者也。外不失人。內不失己。故吉。○又如伊尹樂堯舜之道。顏子之不改其樂。是陽剛處下無應。而自有理義之悅心。亦和兌之義也。

九二孚兌吉悔亡

有孚而說。有其誠心。則誠能動物。人無不悅。上焉得君。下焉得民。內焉順親。外焉信友。雖有可悔之事。而亦亡矣。如舜求必得乎親。必順乎親。而瞽瞍底豫是也。

六三來兌凶

側媚之小人。不遇於上。反就二陽以求說。脅肩諂笑。未同而言。然初剛而正。二剛而中。必不從也。三非惟不足以得人之說。且有以取人之賤惡。是以凶也。

九四商兌未寧介疾有喜

四在正邪之間。始雖擇所從而未定。終則堅守正而疾邪。故有直諒多聞之益。而無便辟善柔之損。是有喜也。○如大臣之絕私黨而忠其君。學者之遠損友而親仁賢。皆可喜也。○春秋晉悼公時。鄭人舍楚而從晉亦是。

九五。孚于剝。有厲。

如唐玄宗初年。勵精政事。幾致太平。晚年自恃無虞。專以聲色自娛。悉委政於李林甫。林甫媚事左右。迎合上意。以固其寵。杜絕言路。排抑勝己。養成天下之亂。而上不之悟也。孚剝有厲。豈不信哉。○雖舜之聖。且畏巧言令色。夫子語顏淵爲邦。終之以鄭聲淫。佞人殆。亦此爻之義也。

上六。引兌。

小人性質柔媚。以聲色貨利。不正之樂引其君。歷代昏庸之主。坐視危亡者多矣。唐太宗英明之主也。能黜權萬紀。言稅銀之利。然知宇文士及之佞。而不能去。況其他乎。○唐宦官仇士良教其黨曰。天子不可令閒。宜常以奢靡娛其耳目。使無暇更及他事。然後吾輩可以得志。此深於引兌之術者也。

三三

坎下
巽上

渙。亨。王假有廟。利涉大川。利貞。

初六。用拯馬壯吉。

如漢景帝時。七國反書聞。上乃拜周亞夫爲太尉。將兵往擊。大破之。其王皆自殺。或伏誅。七國盡平。是始渙用拯。而得壯馬也。

九二。渙奔其机。悔亡。

如劉備帝室之胄。中原無駐足之地。而奔據巴蜀。亦可悔矣。然益州沃野千里。天府之國。可以粗安。而

因之復興漢室。是奔机而悔亡也。

六三。渙其躬。无悔。

陰柔不中者。氣質之偏。志在濟時者。志操之大。如沛公居山東時。貪財好色。是有私於己也。及入關。財物無所取。婦女無所幸。范增謂其志不在小。是志在濟時。能散其私。而悔可亡矣。

六四。渙其羣。元吉。渙有丘。匪夷所思。

人心渙散之時。各相朋黨。不能混一。在廷臣工。如唐有牛李之黨。宋有洛蜀朔黨。在外如漢唐之衰。羣雄並起。割據土宇。而爲黨。惟有才位無私繫者。乃能散小羣。以成大羣。使天下合而爲一。則非常人思慮所及。如漢鄧禹等佐光武。唐世民奉高祖。芟除羣盜。宋趙普相太祖。取蜀。取江南。是渙其羣也。若夫在廷之黨。唐文宗每歎其難去。宋惟司馬光。范祖禹。呂大防。不立黨而已。然未能渙其羣也。

九五。渙汗其大號。渙王居。无咎。

常渙之時。患在情不下達。而澤不下究。故有德之君。必渙其號令。與其居積。則天下歸心。而渙可合矣。如漢高入關。與民約法三章。唐高祖代隋。與民約法十二條。是渙其大號也。如武王革商。散鹿臺之財。發鉅橋之粟。以周窮民。及善人。是渙王居也。○唐德宗時。朱泚反。上幸奉天。下詔罪己。雖狂將悍卒聞之。無不感泣。明年改元。宣布赦書。山東士卒皆感泣。四方人心大悅。陸贄諫宜出瓊林大盈二庫貨賄。以給軍食。是乃散小儲而成大儲。損小寶而固大寶也。有此爻之義。

上九。渙其血。去。逃。出。无咎。

以能濟之才。乘將濟之會。故能散其傷害憂懼。如夏少康。商高宗。周宣王。漢光武是也。

三三兌下坎上

節。亨。苦節。不可貞。

初九。不出戶庭。无咎。

如舍之則藏。孔子可以止則止。顏子居於陋巷是也。

九二。不出門庭。凶。

所謂懷寶迷邦。從事失時。如當禹稷之時。而守顏子之節也。凡盛世有才德。隱而不出者。皆是此爻之象。

六三。不節。若。則嗟。若。无咎。

用財不節。必至空乏。立身無節。難免悔尤。如漢武帝窮奢極欲。而海內虛耗。霍氏驕奢縱橫。而宗族誅夷。將誰咎乎。

六四。安節。亨。

有君主節於上。大臣順而承之。制節謹度。和順從容。則高而不危。滿而不溢。安節之亨。如虞廷稷契。周室畢召之類是也。

九五。甘節吉。往有尙。

聖主以中正之道節天下。合乎人情。宜乎土俗。推之四海而皆準。行之萬世而無弊。如二帝三王之議禮制度。是甘節往有尙也。

上六。苦節貞凶。悔亡。

如陳仲子之廉。居於陵三日不食。申屠狄之潔。抱石自沈於河。及晏平仲祀先。豚肩不掩豆。澣衣濯冠。以朝。君子以爲隘。是苦節貞凶也。

三三

兌下
巽上

中孚。豚魚吉。利涉大川。利貞。

初九。虞吉。有他不燕。

虞吉者。審之於初。因不失其親。亦可宗也。有他不燕者。貳之於後。於其可信者不信。於其不可信者信之。不足爲吾之倚仗也。凡君臣朋友賓主之交。皆有此理。○又篤信好學。亦虞吉也。初學孔孟程朱。而終趨於異端者。是有他不燕也。

九二。鳴鶴在陰。其子和之。我有好爵。吾與爾靡之。

如堯舜禹湯文武之君。皋陶伊傅周召之臣。明良遇合。一德同心也。

六三。得敵。或鼓或罷。或泣或歌。

以陰柔不中正之人復得知信而不知變者爲之應。故作止哀樂。皆無常如此。使得善應輔助。尙不至於顛倒。如衛靈有圉蛇買而不喪。太甲得阿衡而克終。劉禪得孔明而安位。故此爻聖人歸罪其敵也。凡父子兄弟夫婦朋友之間。皆有此。若象傳則指其不正。與爻辭互相發也。

六四月幾望。馬匹亡。无咎。

大臣權任之隆。而能盡心王室。自絕私交。所以无咎。如宋司馬光不立黨是也。○方蛟峯曰。晏子不入崔陳之黨。韓退之不汙牛李之朋。馬匹亡也。

九五有孚。繫如。无咎。

如堯之於舜。舜之於禹。湯之於伊尹。高宗之於傅說。文武之於太公召公。皆信之篤而任之專也。

上九翰音登于天。貞凶。

以爲有是理可執。乃不度時審勢。而必爲之。所謂好信不好學。其蔽也賊。如白公尾生之信。宋襄公之仁是也。○羽族能高飛。其常理也。雖雖羽族而不能高飛。其變也。乃強欲登天。是信非所信。而不知變之象。

䷧ 震上 艮下

小過。亨利貞。可小事。不可大事。飛鳥遺之音。不宜上。宜下。大吉。

初六。飛鳥以凶。

初六與大象相反。過於特勢上行。驕奢躁妄。如漢霍氏諸子。驕侈縱橫。梁冀專擅威柄。凶恣日積。卒以夷滅是也。

六二過其祖。遇其妣。不及其君。遇其臣。无咎。過陽遇陰。是克驕亢之心。秉恭順之節者也。如此則不凌逼其君。而適得爲臣之分也。如周公郭子儀是也。

九三弗過防之。從或戕之。凶。

邪正不兩立。君子防之不至。必爲所戕。唐五王惟失此義。故中武三思之害。○小人之害君子。機變叵測。若不過爲之防。鮮有能自免者。如漢蕭望之。死於恭顯。陳蕃。竇武。死於曹節。王甫是也。

九四无咎。弗過遇之。往厲必戒。勿用永貞。

以剛處柔。過而不過也。往厲必戒。言過剛則危也。勿用永貞。又言不可執柔以爲常也。蓋道無定體。事有異宜。過剛過柔。隨時處中可也。如狄仁傑當武則天時。所以處之者蓋如此。

六五密雲不雨。自我西郊。公弋取彼在穴。

如宋寧宗柔而不明。前用韓侂胄。後用史彌遠。度宗大政。委於賈似道。是兩陰相得。宜乎其國勢日危也。凡不振之主。輔以無能之臣。安能濟大事哉。

上六弗遇過之。飛鳥離之。凶。是謂災眚。

過之已高而甚遠。是驕亢奢侈。至於悖理之甚者。既過之極。豈惟人咎。天災亦至。其凶可知。天理人事皆然也。如漢之竇憲梁冀。唐之楊國忠元載。皆被誅戮是也。

三三 坎下

既濟亨。小利貞。初吉終亂。初九曳其輪。濡其尾。无咎。

當既濟之初。猶未至於亂。若安不忘危。治不忘亂。其心凜凜。將進而未進。將行而未行。則身安而國家可保矣。如唐太宗自言。上畏皇天之監臨。下憚臣民之瞻仰。兢兢業業。猶恐不合天意。未副人望。是既濟之初。存謹戒也。○如湯誥曰。慄慄危懼。若將隕於深淵。帝王保治之心。莫不皆然。

六二 婦喪其茀。勿逐。七日得。

人君狃治安而忽於任賢。自古既濟而能用者鮮矣。以唐太宗之用言。尙怠於終。況其下者乎。○如唐郭子儀克復東京。而肅宗信魚朝恩之譖。而解其兵權。置諸閒散。是婦喪其茀也。代宗立。吐蕃入寇。於是子儀爲副元帥。以禦之。吐蕃退去。是勿逐七日得也。

九三 高宗伐鬼方。三年克之。小人勿用。

天下之事。既濟而遠伐暴亂以救民。高宗伐鬼方之事也。必三年然後克。不可不慎。若用小人。必至於荼毒生民。故不可用。○宋太祖命王全斌伐蜀。斌多殺人縱掠。惟曹彬能戢下。秋毫無犯。自蜀還。囊中

惟圖書數卷。帝責全斌而賞曹彬。及伐唐。遂專用曹彬。得小人勿用之義矣。

六四。繻有衣袽。終日戒。

此思患豫防。制治于未亂。保邦于未危者也。聖賢之心。莫不皆然。

九五。東鄰殺牛。不如西鄰之禴祭。實受其福。

祖伊曰。天既訖我殷命。格人元龜。罔敢知吉。可見紂雖居尊。而時已過也。詩曰。周雖舊邦。其命維新。可見文王在下。而始得時也。

上六。濡其首。厲。

既濟之極。終亂之時也。邵子所謂飲酒酩酊。開花離披時候。當有危險之甚。又以陰柔。不知敬慎。必至於載胥及溺矣。○如唐明皇晚年。自恃承平。以爲天下無復可憂。遂以聲色自娛。委政於李林甫。楊國忠。以致失國奔蜀是也。

三三。坎上

未濟。亨。小狐汔濟。濡其尾。无攸利。

初六。濡其尾。吝。

無才無位。又非其時。乃強進而不能濟。吝之道也。如宋欽宗在金營。太學生徐揆上書。乞請帝還宮。金人取而殺之。此又不止於吝矣。

九二 曳其輪 貞吉

臣剛君柔。易有陵迫之嫌。二居柔得中。則能自止不進。如唐之郭子儀。李晟。當艱危未濟之時。能極其恭順。所以爲得正。而能保其終吉也。

六三 未濟 征凶 利涉大川

才德俱劣。時事方艱。往以求濟。其凶可知。如晉穆帝時。殷浩上疏請北伐。師出无功。復謀再舉。遂致大敗。桓溫疏請廢爲庶人。是也。

九四 貞吉 悔亡 震用伐鬼方 三年有賞于大國

如商太戊當商道之衰。有祥桑穀共生於朝。七日大拱。伊陟曰。妖不勝德。太戊於是修先王之法。早朝晏退。三日而祥桑枯死。商道復興。又如越王句踐。兵敗於會稽。使大夫種行成於吳。退而臥薪嘗膽。十年生聚。十年教訓。而後滅吳。是皆先有悔。勉貞得吉。震伐有賞之象。變化氣質之道。亦當如此。晉周處初行不正。後改惡從善。仕爲將軍。亦此爻義。

六五 貞吉 无悔 君子之光 有孚 吉

如漢文帝。唐太宗。處事或有未正。然能納諫用賢。改過不吝。是貞吉无悔也。治比成康。本於實德。是君子之光有孚也。

上九 有孚于飲酒 无咎 濡其首 有孚 失是

時將濟而才又足以濟。惟當飲食晏樂以需之。然當有節。不可縱樂而忘反也。如晉謝安禦秦兵。出遊山墅。親朋畢集。與謝玄圍棋。後竟大敗秦兵。又如宋寇準勸真宗自將禦契丹。至濱。固請過河。人多危之。帝使人視準何爲。準方與楊億飲博。歌謔歡呼。帝喜曰。準如是。吾復何憂。契丹遂請盟。各解兵歸。台於此爻之義。